



Wantok



Namba 1898 Wan Wik Jenueri 6 - 12, 2011 Niuspepa Bilong Yumi Ol PNG Stret! K1 tasol

Sekim nem...

SEKIM: Yumi kamap gen long dispela taim bilong yia we planti papamama na ol skul sumatin i pinisim Gret 12 I laik save sapos ol I kisim ofa long skruim skul bilong ol. Olsem na stat long dispela wik Tunde, ol sumaitn na ol papamama I no isi long bung ausait long Opis bilong Haia Edukesen long Nesenel Kapitel Distrik long sekim sapos nem bilong ol pikinini bilong ol i stap long go long ol hai skul, kolis na yunivesiti dispela yia. **POTO:** Andrew Molen.



Hamamas nau Krismas wantaim Digicel



Sapos yu baim mobail fon nau Krismas, yu nap kisim wanpla **FRI PRESEN!** Olgeta fon igat fri kredit na sim kad stap insait pinis.

Digicel

Digicel terms na kondisen istap insait.

Planti samting long Mosbi Haus sik bagarap

Paul Zuvani i raitim

POT Mosbi Jeneral Haus sik i bikpela haus sik long kantri tasol sori tumas olsem em i no inap long givim sevis olsem wanpela i ting long em.
Planti samting i sot o bagarap yet.
Dispela ol samting em:
●NOGAT marasin bilong givim long sik manmeri;
●BED bilong silip i sot;
●DOKTA i sot;

●SPES long mog;
●JENERETA bilong mog i bagarap na ol bodi i sting na smel na
●Haus bilong ol wok manmeri i bagarap.
Dispela i mekim kain sevis we ol sik manmeri i mas kisim i no kisim.
Em i gutpela long lukim sampela wok senis i kamap olsem long imejensi wod tasol planti samting i no stret yet.
Bikos long dispela ol hevi Wantok Niuspepa i laik kisim toktok bilong

sif eksekutiv opisa Sam Vegogo tasol i no bin inap.
Long dispela taim ol meri i silip long floa bilong leba wod long karim pikinini.
Dispela i no gutpela long helt bilong mama na pikinini.
Long imejensi wod we nau i stap long bipo klinik bilong ol pikinini i sot long bed.
Ol sik manmeri i silip long floa long dokta i sekim ol.
Na sapos ol i stap i nogat dokta kamap long helpim ol.

Na planti hap bilong haus sik i bruk daun na doti long spet buai na kain kain rabis.
Mista Vegogo i kisim ples long namel bilong 2009 we em i bin tok Mosbi Jenerel Haus sik bai wanpela taim gen i kamap namba wan haus sik long kantri.
Em i tok em sori tru long lukim nogat wanpela dokta o nes i helpim ol sik manmeri long Imejensi Wod.
Ol dokta na nes i lusim ol sik manmeri na go nabaut.
I go moa long pes 3



Magi na Hiritano Haiwe lain i wari long polis rotblok kisim ol katen bia bilong ol

Nicky Bernard i raitim

NOGAT toksave long lika ben o pasim bia. Ol planti lain long Magi na Hiritano Haiwei kisim bikpela taim long ol polis manmeri taim ol i wokim rot blok long haiwe bilong ol long taim bilong Krismas na Nu Yia.

Ol polis manmeri i mekim rotblok na rausim olgeta bia na strongpela dring bilong ol manmeri husat i baim long taun na i laik karim i go long ples long amamasim Krismas na Nu Yia.

Ol lain long haiwe bin bel hevi liklik long

ol polis taim ol rausim ol bia bilong ol na tu ol askim olsem i nogat lika ben long Sentrol provis tasol watpo ol polis manmeri mekim olsem long ol.

“Mipela i save olsem i nogat lika ben. Olsem na mipela i kam long taun na baim bia bilong mipela na go long ples long amamasim Krisma na Nu Yia. Na tu, memba bilong mipela i no putim toksave olsem bai i gat lika ben long Sentrol provins olsem na mipela i kam na westim bikpela mani long baim bia bilong mipela. Nau ol polis

manmeri bai kisim fri bia we mipela westim mani pinis long en,” wanpela bikman bilong Magi Haiwe tok.

Em tok tu olsem ol i no brukim wanpela lo. Ol i no opim katen bia na dring long rot. Olgeta katen bia bilong ol i ful yet na ol putim olsem kago long PMV na dispela ol i no bruk Lo.

Em i tok sapos ol opim katen bia na dring long PMV o kar, yes, em ol i brukim Lo.

Ol yet i no save bai ol i kisim bek ol katen bia bilong ol o ol i lusim olgeta, na mani ol baim bia long en bai olsem wanem nau.



WARI: Polis Haiwe rotblok i rausim ol katen bia long wanpela kar long Magi Haiwe. *Poto: Nicky Bernard*

Ekting PM Abal askim ol Kristen long pre long PNG

EKTING Praitim Minista Sam Abal i askim ol Kristen long kantri long pre long Papua Niugini na long kisim blesing long em.

Em i mekim dispela tok bipo long planti tausen manmeri long Enga husat i kamap long Wabag taun long avinun bilong Krismas long kisim em olsem Ekting Praitim Minista.

Go wantaim Abal long dispela wokabout em Pablik Sevis Minista Moses Maladina, Maining Minista John Pundari, Enga Gavana Peter Ipatas, Westen Hailans Gavana Tom Olga, Not Waghi Memba Benjamin Mul na Ekting Polis Komisina Tony Wagambie.

“Mi no askim o mekim sampela kain samting long kisim dispela ples olsem Ekting Praitim Minista o Deputi Praitim Minista tasol Gren Sif Se Michael Somare long tingting bilong em yet i makim mi.

“Krismas i taim bilong kisim blesing o presen long God na Se Michael long save God i givim em i



MIPELA PRE: Ol sios lida i pre long Abal long Wabag.

makim mi long kisim ples na mekim wok long Opis bilong Praitim Minista.

“Mi givim glori long God na komitim dispela opis bilong Praitim Minista i go long God bikos 6 milion manmeri long PNG i laikim blesing long strongim laip ol i gat long em,” Mista Abal i tok.

Abal, husat i Minista bilong Woks na Memba bilong Wabag i tok sapos ol manmeri i no putim God bipo long laip ol wok i no inap long kamap gut na olsem ol i mas pre long God

long strongim ol long dispela taim.

“Mi askim olgeta Papua Niugini long putim God i go pas long laip bilong ol long wanem olgeta samting i kam long em.

“Mi kisim tupela blesing long God long dispela Krismas, namba wan em Se Michael long wok bilong mi bipo olsem Minista bilong Foren Afeas, Tred na Imaigresen i apim mi na makim mi olsem Deputi Praitim Minista.

“Wanpela wik bihain long dispela em i makim olsem Ekting

Praitim Minista.

“Dispela em ol bikpela blesing.

“Long daunim pasin bilong em, Se Michael i sanap long sait we nogat wanpela man i tokim em long mekim olsem,” Mista Abal i tok.

Mista Abal i tok opis bilong Praitim Minista i no stap nating olsem Oposisen i tok.

“Se Michael long tingting bilong em i sanap long sait na i makim mi long holim wok long dispela opis.

“Mi amamas long mekim wok long dispela opis,” Abal i tok.

Gavman i sanap strong

SAMPELA memba bilong gavman koalisen i kisim avinun malolo na i pul long bot na raun i go long Fisherman ailan bipo long wanpela kibung namel long ol minista na dipatmen hetman bilong ol we bai kamap long dispela wik Fraide.

Long dispela wokabout Ekting Praitim Minista Sam Abal i tokaut olsem gavman i sanap strong na i laik mekim “2011 yia bilong karimaut wok’ long ol

bikpela projek bilong gavman na kibung bilong dispela wik Fraide i bilong tokaut long rot we dispela bai kamap.

Tresera Peter O’Neil i sapotim Ekting Praitim Minista na i tok em bai mas lukim olsem mani ol i makim i redi i stap bilong karimaut wok.

Stap wantaim Abal na O’Neil long ron i go long Fisherman ailan em Gabriel Kapris (Komes na Indastri), Michael Ogio (Haia

Edukesen), Se Arnold Amet (Atoni Jeneral), Ben Semri (Piseris), Moses Maladina (Pablik Sevis), Timothy Bonga (Forest), Sani Rambi (Leba na Indastriels), SHP Gavana Anderson Agiru and Enga Gavana Peter Ipatas.

Stap bilong ol long bot i strongim tingting olsem gavman i stap yet na olsem em bai karimaut ol plen bilong em.



STAP STRONG: Ekting Praitim Minista Abal (sindaun namel) na Koalisen lida i ron long bot long taim ol i raun i go long Fisherman ailan ausait long Mosbi.

Poto: PM’s Media Yunit

Somare bai opim nupela Wewak maket, jeti na polis stesin



LUKLUK: Ol opisa bilong Is Sepik provinsel gavman na Embasi bilong Japan i lukluk raun long nupela Wewak maket em Gren Sif Se Michael Somare bai opim long Janueri 20.

Poto: James Kila

James Kila i raitim

GREN Sif Se Michael Somare, husat nau stap sait-lain praim minista, bai opim nupela Wewak maket, polis stesen na sip bris o liklik bris bilong bot, long Janueri 20.

Dispela seremoni bai kamap long tupela wik taim wantaim bikpela selebresin tru long namel long bisnis senta bilong Wewak taun long Is Sepik provins.

Nesenel Fiseris Atoriti (NFA) husat i redim pinis program long opim maket i laik toksave long ol pipel bilong Wewak na Is Sepik provins olsem opisal taim bilong opim nupela Wewak maket, jeti na polis stesin em Janueri 20,

2011. Menesing Dairekta bilong NFA, Sylvester Pokajam, i tokaut long wanpela midia toksave olsem ol samting we i stap wantaim nupela maket na polis stesin na jeti o sip bris i redi pinis olsem na Se Michael bai opim.

Mista Pokajam i tok taim bilong opim maket na jeti i wok long tenis planti taim long las yia bikos wok long nupela polis stesin i no bin pinis

“Mi laik kisim dispela taim long tok sori long olgeta lain husat i wok long redim ol samting bilong opim nupela maket na planti hatwok i go nating taim tenis i kamap long taim bilong opim,” Mista Pokajam i tok.

“Mipela i redi nau long go

het wantaim seremoni long opim ol dispela samting long Janueri 20,” em i tok.

Dispela nupela maket na jeti o liklik sip bris em Gavman bilong Japan i putim mani long wokim na Gavman bilong PNG tu i helpim wantaim sampela mani.

Bikpela as tingting bilong kamapim dispela Wewak Maket na jeti o liklik bris bilong ol liklik bot i go sua em long helpim ol lokal o asples pipel long kamapim mani long sait bilong bringim gaden kaikai na tu long helpim ol pipel long salim fis long kisim mani na helpim sindaun bilong long ples wantaim famili na komyuniti bilong ol.

Vegrensi Lo mas kam bek: Labi

Bustin Anzu i raitim

NESENEL Gavman i mas luksave na kisim bek Vegrensi Ekt kam bek long kontrolim muvmen o wok-abaut bilong ol pipel insait long kantri. Na long wankain taim, i mas givim polis pawa long lika laisensing na trefik na registri, Komanda bilong polis long Momase i tok.

Asistent Komisina bilong Polis (ACP), Giossi Labi, i bin mekim dispela toktok long wanpela bung bilong ol bik bos bilong polis long Lae long pinis bilong las yia.

Em i tok Vegrensi Ekt i mas kam bek na kontrolim ol manmeri long i go long ol taun ples. Nau yet, i nogat sampela kontrol long ol manmeri olsem na ol i go kam long laik bilong ol. Na dispela i mekim ol setelmen i kamap insait long ol taun na siti olsem ol masrum.

“Mipela tu i lukim planti hevi i wok long kamap insait long ol bikpela taun na siti bilong mipela. Na dispela i kamap taim planti manmeri insait long ol rurel eria i go kam long

taun”. “Mipela i ken stopim dispela pasin sapos dispela Vegrensi Ekt i kamap bek gen long kontrolim dispela muvmen,” Mista Labi i bin tokim ol bikpela manmeri bilong polis long Melanesian Hotel long Komisina’s Konprens.

Em i tok tu olsem Lika Laisensing na Trefik Registri mas go bek long polis long kontrolim pasin bilong kisim laisens long salim bia na givim aut laisens bilong ol draiva.

“Planti hevi tu i kamap long kantri long wanem, i gat planti ples bilong salim bia nating nating a ol ino bihainim gut rot bilong kisim laisens na salim.

“Wankain long laisens bilong kar tu. I nogat gutpela kontrol long sekim ol man o meri bipo long givim laisens i go aut long ol draiva. Olsem na mipela i bin witnesim planti eksiden long rot”, em i tok.

Sampela bikpela hevi na dai long rot em kisim wara na draivim kar krangki na i no bihainim mak bilong em.

Em i tok tu olsem mekim save bilong kalabusman

meri long kisim ol spak brus tu mas go antap.

“Nau yet, sapos yu lukluk gut tupela krismas long man o meri i kisim spak brus na go kamap long kot em i no bikpela tumas. Em i daunbilo tru na planti yangpela i kisim spak brus tasol kot bilong spak brus i no bikpela tru. Olsem na planti i mekim pani wantaim dispela.

“Lo i mas senis long apim dispela mekim save i go antap na dispela bai mekim ol pipel long surik na respektim dispela lo,” em i tok.

Dispela em ol sampela tingting bilong em, we em i bin autim long taim ol bikpela bos bilong polis i bin bung long Lae.

Dispela miting i bin lukim tupela ekting Komisina, Komisina bilong Polis Anthony Wagambie na namba tu bilong em long Operesens Fred Yakasa, i bungim olgeta bos bilong polis long provins (Provinsel Polis Komanda) na ol narapela bik bos bilong polis long polis Hetkwata na skelim tingting bilong ronim polis fos.

Sting nogut bilong bikpela dai pis i bagarapim Bakumbari nambis na pipel

James Kila i raitim

OL MANMERI long Bakumbari kea senta long nambis long Oro provins i no pulim gutpela win bikos smel nogut bilong wanpela bikpela dai pis bilong solwara i bagarapim ol stret.

Planti manmeri i no kaikai

gut bikos sting smel bilong dispela dai pis i mekim ol pilim traut na tu sampela i kus na bel i tanim tanim.

Ripot *Wantok Niuspepa* i kisim long wanpela Non-gavman ogenaiesen (NGO) mausman long Popondetta, Adelbert Gangai, i tok olsem ol pipel i kisim bagarap tru long smel bilong dispela bikpela pis o weil bilong bikpela solwara

Gangai i tok olsem dispela bikpela pis o weil bilong solwara i bin go antap nambawan taim tru long Disemba 23 long nambis bilong Beama. Long dispela taim dispela bikpela pis i no bin dai. Olsem na ol pipel i toktok na pasim rop na yusim foapela dingi long pulim weil ya i go ausait long bikpela solwara na i daunim em i go daun.

Em i tok ol pipel i yusim ol

olpela bom bilong woa long mekim bikpela pis ya i hevi na em i ken go insait long solwara.

Tasol long Janueri 1 em Niu Yia stret, hap bodi bilong dispela bikpela pis o wel em solwara i karim i go lusim long nambis long Bakumbari.

Ol manmeri husat i stap long Bakumbari kea senta em ol dispela lain we bikpela birua bilong Strongpela win na tait wara ol i kolim ‘Cyclone Guba’ i bin bagarapim ples bilong ol na ol i stap. Tasol nau yet narapela hevi bilong sting smel bilong dispela bikpela pis bilong solwara i bagarap ol tru.

Ol pipel long Bakumbari kea senta nau i askim ol atoriti we i save lukautim kea senta long mekim sampela samting long rausim dispela samting we i bagarapim sindaun bilong ol.

Planti samting long Pom Haus sik bagarap

I kam long pes 4

Em i tok em i go raun lukim tu haus silip bilong ol wok manmeri.

Em i go olgeta long rum ol i silip na em sori olsem stap bilong ol i moa nogut long ol manmeri i stap long setelmen.

Em i tok em bai yusim botom ap plening long bringim bek gutpela stap bilong haus sik.

Na dispela em bai stat wantaim midel menesmen, wantaim ol dokta na nes bipo long em i go long sinia menesmen.

Em i tok moa tu olsem ol wok i laikim tasol 40 pesen bilong mani.

Narapela 60 pesen i stap wantaim opisa long em i yusim save na strong bilong em long pinisim wok.

Mosbi Haus sik i bikpela haus sik long

kantri na i stap klostu long opis bilong nesenel gavman tasol stap bilong em i no gutpela.

Sapos dispela i olsem wanem hop moa i stap bilong ol manmeri i gat taim ol i long ol haus sik i stap longwe long Mosbi.

Planti ol haus sik, helt senta na aid pos i bagarap o pas pinis bikos nogat wanpela gutpela wok i kamap. Gavman long 2011

Mani Plen i putim olsem K84. 8 milion long ol hospital na K13 milion long ol komyuniti helt pos.

Em i givim K14 milion provinsel transit medikol stua na putim K25 milion long kisim ol Cuba dokta i kam long sapotim ol dokta long kantri.

Sapos dispela i gutpela ol manmeri i mas lukim sampela senis long laip bilong ol.

Kantri gat salens long sik kolera

Veronica Hatutasi i raitim

SIK KOLERA em wanpela salens we kantri i karim long las yia i kam long dispela nupela yia na olgeta lain i mas putim han wantaim long daunim.

Siaman bilong Nesenel Kapitell Distrik Task Fos, Dokta Timothy Pyakalya i tok.

Em i tok dispela sik i wok long kisim ol bikpela manmeri na em i luk olsem ol bikpela manmeri i no wok long harim ol toktok na mekim samting stret long bihainim gutpela haijin.

"Sik i stap yet long Mosbi siti bikos pipel i no wok long bihainim gutpela haijin. Kolera i stap bikos yumi no mekim ol

samting yumi sapos long mekim. Em long wasim han wantaim sop bihain long yusim toilet, bipo long kaikai, taim yu redim kaikai na rausim ol lang long kaikai.

"Tu, yumi mas was gut long wanem samting yumi putim long maus bikos sapos han i no klin o yu baim long hap we ples i no klin o ol plai i holim, em yu yet nau," Dokta Pyakalya i tok.

Em i tok tu olsem taim ol man i pekpek nabaut long drein o ol hap bus o surij o paip long rot bilong toilet i blok na i kapsait, bai gat hevi.

"Yumi kamap long nupela yia, tasol hevi long sik kolera i stap yet na dispela em i wanpela salens," Dokta Pyakalya i tok.

Em i tok Morata Klinik we i save sevim ol sikman long dispela eria we long Krismas i kam inap nau i stap pas bikos sampela lain i bin kamapim hevi.

Morata em wanpela eria we sik i kolera i wok long go antap na olsem Katolik Sios husat i papa bilong dispela klinik i askim Helt Dipatmen long givim mani helpim long em long opim bek gen klinik.

Dokta Pyakalya i tok Pot Mosbi Jenerel Haus sik kolera wod i gat 12-pela bet tasol long ol siklain bilong slip long en, tasol long Krismas taim, wod i bin kisim samting olsemn 20 kolera siklain.

Komyuniti strong long kamapim wok developmen

Seniorl Anzu (NARI) i raitim

OL manmeri long Kangaroo long Finshafen, Morobe Provins i soim olsem, maski gavman i no givim helpim, ol i ken kamapim wok developmen long ples bilong ol.

Long las wik Fonde bipo long nu yia, ol i kamapim nupela haus na putim rais mil i go insait long dis-

pela haus.

Dispela nupela haus em ol i mekim long olupela Satake rais mil masin na storim nupela rais ol i kamapim long em.

Lokol Memba, Theodore Zurenuoc, husat i witnesim dispela lonsing, i amamas long tingting na wok bilong ol.

Dispela haus em ol i sanapim

long mani mak bilong K58,000 we Komyuniti Developmen Skim (CDS) bilong AusAID i givim olsem K48,000 na komyuniti yet i kamapim olsem K10,000.

Bikos nogat rot ol manmeri i karim ol kago long sol long Gagindi stesin na go long Kangaroo long sanapim haus.

CDS i givim sapot bihain long komyuniti i soim plen bilong ol.

Kangaroo i bus ples long Yabim. Mape lokol level gavman kaunsil.

Wankain olsem ol arapela ples long distrik, Kangaroo komyuniti we olsem 400 manmeri i stap long em i stat long planim rais long taim namba wan ol misinari bilong Luteran i sua long Simbang na soim rot bilong planim rais long 1932.

Long 1998 bipo primia bilong Morobe, Utula Samana, i givim ol manmeri bikpela Satake masin bihain long em i luksave olsem ol manmeri long Kangaroo i save kamapim rais bilong ol yet.

Wantaim nupela haus we ol i mekim long 2007 ol manmeri i bilip dispela bai helpim masin long kamapim planti rais.

Huna Made, bipo projek supavaisa na nau Yangpela Didiman kodineta bilong Luteran Developmen Sevises long Finshafen, i tok nupela haus bai lukim ol inap kamapim planti rais long inapim laik bilong ol arapela komyuniti.

Tommy Polang, mausman bilong CDS, i tok kamapim kain wok i soim laik na strong ol manmeri i gat long sapotim ol yet.



KISIM LUKSAVE: HAC Ekting Het Tisa Philip Senat i tok amamas long Wesley Mapa bilong Wes Nu Briten husat i kamap namba wan long planti ol wok long didiman skul long las mun.

Didiman kolis kamapim save manmeri long strongim wok didiman

HAILANS Agrikalsa Kolis we i stap ainit long Dipatmen bilong Agrikalsa na Laipstok (DAL) i primia agrikalsa trening skul long Pasifik rijen na i no bilong Papua Niugini tasol.

Ekting prinsipel bilong kolis Philiup Senat i tok kolis i gat bikpela wok long mekim long rijen na dispela i bilong trenim ol manmeri bai ol i kamapim ol wok bilong sapotim laip.

Tasol i tok kolis i no inap long kari-maut gut wok bilong em sapot em i no kisim gutpela sapot.

"Bikos long planti ol bikpela hevi olsem klaimet tenis na globel woming manmeri bai bungim planti hevi long laip olsem sot long graun, gutpela graun, kaikai na hangre na olsem kolis i wanpela gutpela hap bilong kisim save bilong mekim ol samting na sapotim laip.

"Tasol em laikim tu sapot long ol arapela lain olsem gavman long

mekim gut wok bilong em," Mista Senat i tok. Senat i mekim dispela tok long taim bilong greduesen long las yia Disemba.

Long taim kolis i stat gut ol skul bilong em, dispela i lukim planti ol sumatin bilong arapela Pasifik ailan kantri i kam na kisim skul.

Stat long 2007 kolis i kamapim ol setifiket kos long agrikalsa na agribisnis menesmen kos bilong ol fama na skul liva.

Dispela ol strateji i go wantaim long Gavman polisi na plen long Visen 2050.

Kolis i gat ples bilong kisim olsem 150 sumatin long wanpela yia.

Kolis i kamapim nupela rekot tu long kisim TVET sumatin long ol arapela skul i go long kisim setifiket long agrikalsa.

Senat i askim pablik long aplai sapos ol i laik kamapim wok didiman.

BIRTHDAY GREETINGS

Paolo Tiensten Sakete

Turned 13 years old yesterday - 05/01/2011



Love and best wishes from: Hunter the Terror; Kiddies next door - Nunufoi, Jet Lee & Padu; Cranies 'bata stret' - Kallis & Brandon Kodana, Brandon, Ismael & Jeremy Kaipu, Michael

Lapu; your bapapas Anthony & Mario Niniku @ Waga Heights, Lukas Mekea @ Toks and Paul Mitu @ North Waga.

Much love from the hauslain - Mum, Dad, aunty Grace, mama Pweks & Terence.

'Lord, we thank you for the gifts you have blessed us with'.



LUKAUTIM PLES: Dispela 22-yia Satake rais mil nau i stap long gutpela haus long Kangaroo long mekim wok.

Bung wantaim na paitim korapsen

KORAPSEN i stap insait long kantri na planti ol ogenaisesen i wok long sevim na helpim ol grasrut na ol turangu i save lusim helpim mani bilong ol. Stilim mani em rong na em i wanpela sinpasin. Bai i gat kot long graun na long heven long manmeri i mekim dispela pasin nogut.

Wanpela bikipela stori i bin kamap long ol niusepepa long mun i go pinis. Stori i tok long korapsen i stap bikipela tru insait long ol gavman dipatmen na ol i mas stretim hariap nau. Stori i kolim nem bilong sampela man na ol i tok ol dispela man i go pas bilong stretim dispela stilpasin i wok long bagarapim kantri.

Taim mi ritim nem bilong ol man, mi lap nogut tru, bikos nem bilong wanpela man i stap. Em yet i save go pas long mekim dispela pasin nogut. Planti ol ogenaisesen i kisim hevi long stilpasin bilong em. Bai mi stori long dispela man, bai yumi kolim "Franko".

Dispela man, Franko, ol holim bikipela namba tru long wok insait long gavman. Sapos yu bungim em, bai yu ting yu lukim wanpela gutpela man tru .

Em i marit man wantaim naispela famili. Em i man bilong lotu na em i salim ol pikinini i go long gutpela skul. Na i tru, i luk olsem Franko em i wanpela gutpela man i save wok hat tru na lukautim gut famili bilong em. Tasol pasin em i mekim i narakain. Pasin korapsen bilong em i save wok olsem.

Sampela ol i aplai long sampela helpim ("Grant mani") long wokim wanpela projek long skul o haus sik o ples, o narakain samting. Yumi kolim nating lain i aplai: "Helpim Grasrut Senta" (HGS). Gavman i skelim askim bilong HGS na givim tok orait long askim bilong ol.

Franko i ringim HGS long telepon na tokim ol, ol i win na bai ol i kisim dispela "Grant- mani", em olsem K100,000.00. Bihain Franko i ring bek gen na tokim HGS em nidim K1,000.00 bilong stretim ol pepa samting ("paper work") bilong redim sekmani long ol. Ol lain bikong HGS i save dispela askim i no stret tasol ol i tingting K100,000.00 na givim dispela mani long Franko.

Sampela wik i go pinis, Franko i ring gen na i tokim em ol i laikim K2,000.00 moa. Bod bilong HGS i bung gen ol i pilim olsem samting i no stret na Franko i gridi nau.

Tingting bilongol i paul nau. Sapos ol i tok nogat bai ol i lusim K1,000.00 na nogut lol i usim K100,000.00 wantaim. Sapos ol i ripot long polis, bai polis tok: "Yupela rong long givim em dispela mani pastaim. Asua bilong yupela !" Orait, ol i givim Franko K2,000.00 moa. Nau man i go long Franko em K3,000.00.

Sampela wik i go pinis na Franko i ring gen. Em tok em laikim las K5,000.00 bilong stretim ol samting. Em i tok long las askim bilong em nau, na bihain bai ol i kisim sek K100,000.00 kwiktaim. Franko i askim ol long dpositim mani long Benk Akaunt bilong meri bilong em. Na em i givim namba bilong Benk Akaunt bilong meri em bai ol i ken salim mani.

Bod bilong HGS i bung gen na ol i tok inap nau! Ol i tokim Franko nogat! Franko tu i tok nogat! Ol i no kisim K100,000.00 "Grant- mani" na HGS i lus long K3,000.00 tu. Franko i win! " Helpim Grasrut Senta" (HGS) i lus olgeta!

Franko i stap yet na kontrolim ol sek- man i go aut long gavman. Em wokim wankain trik long planti ogenaisesen, tasol nau plant i save long pasin bilong em na ol i no trastim em. Komyuniti inap mekim wanem nau? Ol HGS na arapela ogenaisesen i ken go long polis. Ol i gat ol telepon rekot na Benk Akaunt namba na wankain

stori. Ating tu polis i kisim pinis sampela ripot nogut long Franko? Ol gutpela manmeri mas sanap na paitim korapsen. Sapos nogat bai dispela lain nogut i kontrolim yumi.

I gat planti ol arapela pasin nogut ol Franko – lain i save wokim. Olsem askim long 10% kes- mani bipo ol i givim sek-mani long wanem manmeri na organaisesen.

Narapela trik em long bihain yu raitim

nem long buk bilong soim yu kisim sek pinisol i askim yu long kisim sek i kam bek bikos ol i laik stretim ol samtingna ol bai giivm nupela sek long yu.

Trik em dispela: Yu raitim nem pinis olsem yu kisim sek pinis. Na sapos yu givim sek bek long ol, bai ol i paulim mani long yu bipo yu kisim bek gen. Na i gat planti arapela kain trik ol i save wokim.

Yu givim stilman mani, em bai stilim

moa mani. Gavman dipatmen, ol bikipela lokol gavman tu i bagarap long ol dispela kain pasin nogut. i klia ol niusepepa i save pinis long raskol pasin bilong man mi kolim "Franko".

Ol Mosbi lain i save long yu nau. i no longtaim bai yu wantaim meri bilong yu i go slip long kalabus long Bomana.

Ol gutpela manmeri i mas sanap na paitim korapsen. Sapos nogat, bai ol dispela lain nogut i kontrolim yumi.



**DEPARTMENT OF EDUCATION
WAIGANI**

PUBLIC NOTICE

2011 NEB MAXIMUM SCHOOL FEE LIMITS

This notice explains the 2011 Maximum School Fees set by the National Education Board (NEB).

MAXIMUM SCHOOL FEE LIMITS FOR 2011

The NEB has decided that the Maximum School Fee Limits for 2011 will remain the same as for 2010 for all institutions. The NEB made the decision based on the outcomes of the latest survey "Parental School Fees Affordability Study" (2009) which ascertained various hardships parents were experiencing living beyond their means. The NEB sets maximum school fee limits in order to guide provincial education authorities and Department of Education Divisions to set realistic fees. The 2011 school fee limits take into account the rise in the prices of goods and services, the effects of inflation and also the need to keep the cost to parents as low as possible, but at the same time provide schools and colleges with sufficient funds for their operational costs. This decision applies to national institutions (including institutions in the National Capital District) and provincial institutions in provinces where a current Provincial Education Act is not applicable. Tables (a), (b) and (c) below, show the maximum fee limits.

(a) Elementary, Primary, Vocational Centres, Secondary/NHS and FODE

School Level	NEB Maximum Fee Limits (K)
Elementary (Prep-Gr.2)	No Parents component
Primary Gr. 3-6	230
Primary Gr. 7-8	230
Secondary/Vocational Gr. 7-10 (Day)	750
Secondary/Vocational Gr. 7-10 (Boarder)	1,100
Secondary/National High Schools Gr. 11-12 (Day)	800
Secondary/National High Schools Gr. 11-12 (Boarder)	1,300
FODE (per subject)	80

(b) Technical and Business Colleges

Course	Duration	Course Fees	Messing Fees	Total
Diploma/Technician	Semester (22 weeks)	K1,450.00	K730.00	K2,180.00
Diploma/Technician	Year (44 weeks)	K2,800.00	K1,800.00	K4,600.00
PETT/TTC (self-sponsored)	Year (44 weeks)	K2,800.00	K1,800.00	K4,600.00
PETT/TTC HECAS (sponsored)	Year (44 Weeks)	K2,800.00	K1,800.00	K4,600.00
Bridging Course	10 Weeks	K770.00	K400.00	K1,170.00
Apprentice/Extension	8 Weeks	K730.00	K320.00	K1,050.00
Part Time/Special Course	Vary, depending on volume of course			

Colleges will also charge K300.00 as administration fee for 44 weeks courses

For further details, contact:

Superintendent-Operations
Technical Vocational Education and Training Division
Department of Education
P O Box 446, WAIGANI,
National Capital District
Telephone: 301 3539

(c) All Primary Teachers' Colleges and PNG Education Institute (PNGEI)

Courses	Duration	Type of student	Admin & Course Fees 2011	Messing Fees	Total
Primary Teachers' Colleges Diploma in Teaching (Primary) and PNGEI	36 Weeks	HECAS	K1,257.00	Set by OHE	Sum of what students & OHE pay
		Corporate Sponsorship	K5,000.00		
		Self Sponsored (Day)	K3,500.00	Set by OHE	Sum of what students & OHE pay
		Tuition Self sponsored (Boarder)	K4 500.00 (Boarder) K2,635.00 (Day)	Set by OHE	Sum of what students & OHE pay
Diploma of Vocational Education and Training (DOVET)		DOVET	K3,892.00		

For further details, contact:

Assistant Secretary
Teacher Education Division
Department of Education
P O Box 446, WAIGANI,
National Capital District
Telephone: 301 3363/64

For further information, contact:

Assistant Secretary – Policy, Planning and Research Division	Tel: 301 3564/65
Assistant Secretary – Coordination, Communication and Legal Services Division	Tel: 301 3359/60
First Assistant Secretary – Policy and Planning Wing	Tel: 301 3349/50

This maximumfee limits have been approved by the National Education Board in its Meeting No. 169 on the 22nd-23rd September 2010 in Port Moresby.

DR JOSEPH PAGELIO
Chairman - National Education Board

Lae polis karimaut gutpela rot sefti operesen

Bustin Anzu i raitim

BOS BILONG Lae polis i tok amamas long gutpela wok bilong ol long Rot Sefti long Lae siti las wiken.

Sif Superintenden Nema Modiai i tok em ino rot sefti operesen tasol, i gat narapela wok tu em ol i bin wokim long dispela wok we kamap insait long 3-pela wiken.

Long kain wok bilong ol tok-save long ol pablik olsem, polis i mekim wok operesen bilong ol long dispela longpela holide i gutpela.

“Dispela em wanpela gutpela rot sefti operesen em mipela i bin holim. Polis i bin sanap long olgeta kona bilong rot insait long siti long mekim olsem ol pablik i ken amamas long gutpela de bilong malolo. Olsem na tu, i nogat planti eksiden bilong rot i kamap long dispela taim,” em tok.

Em i mekim dispela toktok long wanpela kibung long Aviat Sosel Klub bihain long pasim dispela bung bilong ol long las wiken.

Dispela wok bung bilong ol sefti oporesen i bin lukim ol polis-man insait long Lae siti, Provin-sel Trefik Rejistri, Nesenel Rot Trensot na Moto Vikel Insurens Limited (MVIL) i bin wok bung wantaim.

Mondia i tok insait long tripela wik operesen polis i bin sasim 37 biket man long ol trefik trabel, rausim rejistresen bilong 30 ka, lokim 52 ka o bas na givim aut moa long 2000 TIN o Trefik Infringmen (Traffic Infingement Notice).

Tasol Lae siti polis i tok i gat planti ol kar we i nogat pepa na



ROTBLOK: Polis long olgeta hap bilong kantri i bin karimaut Krismas na Nu Yia Yia rotblok operesen long sekim ol sefti bilong pipel na ol kar na ol manmeri i ken gat ol gutpela selebresen long dispela taim. Poto i soim ol Pot Mosbi polis I sekim ol kar long operesen bilong ol. Poto: Nicky Bernard

rejistresen bilong ol long raun long rot na ol i raun yet. Ol i no bin sekim olgeta kar long wanem, ol i nogat taim long sekim olgeta. Sapos ol i bin sekim olgeta kar, em bai ol i painim planti kar i no stret na fit long raun long rot.

“Pasin bilong sekim kar long rot em i wanpela bikpela wok we mipela i no bin pinisim ol hap wok na mi laikim olsem mipela mas kamapim narapela rot sefti oporesen bilong sekim ol dispela kar gen.

“Mipela i gat planti moa wok long wokim long sait bilong sekim ol kar. Na dispela mas kamap gen,” em i tok.

Eksekutiv opisa bilong Trefik Registri Joshua Mais i tok Morobe Provin-sel Administraitra i bin amamas long gutpela wok bilong ol insait long tripela wik na em i tok long putim narapela wankain rot sefti operesen long namel bilong yia.

Mais i tok planti ol kar ol ino gat pepa long karim raun na yusim pablik rot na tu taim ol daunim wok bilong ol transpot Inspekta , planti pepa lain bilong kar i no stretim kar bilong ol.

Mais i tok ol stopim wok bilong ol transpot Inspekta long sampela 5-pela yia i go pinis, na planti kar i go hait long stretim

pepa. Na dispela i mekim planti kar i nogat pepa raun i stap.

Tasol long dispela rot sefti oporesen, ol dispela lain i ken kam soim pes long trefik rejistri long stretim kar bilong ol. Na dispela i mekim opis bilong trefik rejistri i pulap na pas olgeta.

“Ol bikhet long kam long opis na stretim ol pepa bilong ol. Ol i save olsem long karim kar na ron long kain rot i no gutpela na stretpela pasin. Tasol ol i no tingim dispela,” em i tok.

Em i tok eot Sefti Kaunsel (National Road Safety Council) i bin kisim dispela wok na wokim awenes long klostu long pinis bi-

long las yia, het opis bilong ol i stopim na rausim dispela wok. Olsem na ol i no wok moa long rot long sekim ol kar.

Mais i tok nau yet ol i gat bikpela tingting long kisim ol rot inspekta bilong ol i go bek long sekim ol kar long rot long mekim olsem ol i mas stretim na kamap gut.

“Nesenel Rot Sefti Kaunsel i lusim wok na dispela i mekim mipela gat planti wok long mekim. Olsem na i luk olsem mipela bai givim dispela ol wok i go long ol rot inspekta long sekim ol kar insait long Lae siti,” em i tok.

PAOLO TIENSTEN SAKETE

13 YEARS OLD – 05/01/2011

Happy Belated Birthday Greetings from Nei Chris, Julie, Pokie, Nunufoi, Jet Lee, Kun, Keleu, Brenda & Bata Richard. Special thoughts from Wayne and Juem in Madang; uncle TA @ Awa Island & mama Mac @ Iros Island – Manus Province.



LDS kisim K100,000 mani helpim

Bustin Anzu i raitim

LUTERAN Dvelopmen Sevis o LDS (Lutheran Development Service) i bin kisim sampela luksave long han bilong wanpela memba bilong palamen bilong Morobe provins.

Memba bilong Finsafen, Theodore Zurenuoc, i givim K100,000 i go long LDS long Finsafen long helpim ol long mekim wok bilong ol long distrik bilong em.

Em i givim dispela mani long ples Kangaruo long bus bilong Yabim/Mape Lokel Level Gavman long las wik.

Dispela mani em i bin kam long namba tu distrik prairiti em long kirapim wok dvelopmen long ol ples.

Bikpela luksave bilong dispela mani em long wok bilong kopi, kokoa na rais agrikalsa insait long ples.

Em i tok amamas na tenkyu long wok bilong LDS long i go long olgeta kona bilong distrik bilong Finschafen long givim agrikalsa sevis i go lomg ol pipol bilong em. Dispela em sampela wok helpim we didiman han bilong Evanjelikol Lutheran Sios bilong Papua New Guinea (ELC-PNG) i save helpim bilong wok didiman insait long kantri.

“LDS em wanpela bikpela patna bilong wok dvelopmen insait long Finschafen. Ol i mekim wok insait long ples we gavman sevis i no bin go na hat long go insait. Na dispela han bi-long misin i wokim bikpela wok na mi

amamas long dispela ol luksave sios i givim,” em i tok.

Em i tok wankain mani em ol i givim long wok bilong LDS long 2010.

Zurenuoc i tok wok bilong stretim wok bilong trenspot insait long distrik bilong en em namba samting.

Em i tok ol i bin makim pinis K500.00 long mekim rot long nambis i go insait long ples Kanaruo long maunten na dispela bai kamap long bihain taim long dispela yia yet taim wok bilong rais i go bikpela insait long ples.

Tasol em i tok wok bilong lo na oda em i wanpela bikpela hevi i wok long lukim ol dispela sevis i wok long kam bihain na em i putim K1m long putim namba bilong polis i go antap moa.

333 pipel long NCD na Sentrel i kisim sik kolera long Krismas na Nu Yia

Veronica Hatutasi i raitim

MAK bilong sik kolera i wok long go antap moa yet we long mun Disemba i kam inap nau, i lukim 333 pipel i pondaun long dispela sik na kisim helpim na marasin long ol dokta long haus sik.

Olsem na strongpela toktok i go aut long pablik long Nesenel Kapitel Distrik (NCD) na kantri long bihainim gutpela pasin na haijin na wasim gut han na wanem samting ol i putim long maus bilong ol.

Siaman bilong NCD Kolera Komiti, Dokta Timothy Pyakalya i tok olsem aste bihainim bikpela mak stret long ol pipel i kisim sik kolera long mun Disemba, i go olsem long Krismas taim na Nu Yia i kam inap nau.

Long mun Disemba yia i go pinis tasol, 295 pipel long NCD na Sentrel provins i bin pondaun wantaim sik kolera taim insait long 4-pela de tasol long nupela yia yumi stap nau long en, 38 pipel i go long haus sik pinis wantaim sik kolera.

Dokta Pyakalya i tok mak long pipel i pondaun



NOGAT BET BILONG MAMA NA BEBI LONG MATENITI WOD. Long mama i karim nupela pikinini em i taim bilong amamas, na moa yet, long taim bilong Krismas o nupela yia. Tasol olsem poto i soim, sampela ol mama i karim ol nupela bebi long Krismas na Nu Yia taim i no amamasim gut dispela ol biked bikos ol bet long meteniti wod i pulap na ol mama husat i karim nupela wantaim ol nupela pikinini bilong ol i siip long simen plua bilong haus sik long wod bilong ol. **Poto: Nicky Bernard**

long sik kolera long mun Disemba em i bikpela tumas na i winim tu mak long ol man we ol haus sik long NCD i lukim na helpim insait long wanpela mun stat yet long taim sik i bin stat long siti long mun Epril las yia. Long 295 pipel i kisim sik long mun Disemba, 209 i bilong ol ples long NCD na 86 em ol bilong ol ples long Sentrel provins.

Long mun Septemba

las yia tu, mak i bin go antap long 205 taim sik i bin daunim planti pipel long ples Lealea, em wanpela nambis Motu ples long Sentrel provins. Dispela i bin kamap bihainim long wanpela independens skul selebresen kaikai.

Dokta Pyakalya i tok insait long NCD, Koki em wanpela eria we i "hotspot" o sik kolera i kamap bikpela moa yet

taim ples Kido na Lealea em ol hotspot long Sentrel provins.

Sik i stap nau long olgeta hap insait long Mosbi siti tasol ol setelmen eria olsem Morata na ol narapela hap moa e mol ples we sik i wok long kisim planti pipel.

Em i tok ol bikpela man i wok long kisim sik kolera na dispela i soim olsem ol bikpela manmeri i wok long bikheth na i no bihainim gutpela haijin.



NAMBA WAN PIKININI: Rachael Mathias i gat 20 krismas bilong Jiwaka i bin karim namba wan pikinini bilong em long Krismas de stret long 4:30am bikmorning. Hevi bilong nupela pikinini em 3.2kg.

"Mi sapos long karim long Desemba 19, tasol dispela i no kamap. Ating bikman laikim mi karim long de bilong em stret. Mi amamas nogut tru taim mi karim long Krismas de stret". Rachael i tok. **Poto: Nicky Bernard**



LAIP i kam long God bilong stap wantaim God:

LAIP em samting bilong man - man, meri na pikinini. God i wokim olgeta samting bai wan wan i kisim laip na i stap laip long taim God yet i makim; na bihain, dispela laip, hia long graun i pinis, bai man i lusim dispela graun na go i stap wantaim God. God i wokim yumi bai yumi stap wantaim God - long hia long graun nau, na bihain long laip bilong oltaim. Laip em samting God i givim na lukautim.

God i wokim man na putim long graun ol samting man i nidim long lukautim laip. Lo bilong laip em wanpela man i lukautim narapela man. Papamama, komyuniti, Sios na Gavman i wok wantaim ol pipel bilong mekim dispela wok lukautim. Sin pasin, gridi manmeri, selpis pasin, na givim baksait long God i save bagarapim laip bilong man long wol.

Pikinini bilong God i kamap man:

Long Krismas, yumi selebretim God i kamap man wankain long yumi man bilong dispela graun. Long strong bilong Holy Spirit, Maria, wanpela virgo, i karim pikinini man Jisas. Dispela pikinini em Son bilong God.

Krismas 2010 na Olpela Yia i Go Pinis

God em God bilong askim pastaim!

Bipo God i salim Pikinini bilong em i kamap man, em i askim man long tok orait pastaim. Em i salim ensel long askim Maria long kamap Mama. Em i salim ensel i kam long askim Josep long kamap waspapa. Tupela i tok yesa na Son bilong God i kamap man. God i no fosim man. God i save askim man pastaim!

Son bilong God i kamap man na mekim wok Sevia.

Jisas, Son bilong God, i kam olsem Ridima, bilong oraitim ol manmeri bilong graun na mekim ol i inap long stap wantaim God gen. Man i save lus na givim baksait long God long sinpasin bilong em. Jisas indai long Kruse bilong pogivim sin bilong ol man - ol sin bilong bipo, ol sin bilong nau na ol sin bai man i mekim bihain tu. i tru, yumi man i save mekim planti sin tumas na spoilim sindaun bilong yumi hia long graun.

Lukim nau ol samting nogut i spolim pinis sindaun bilong PNG long 2010. Ol dispela samting i bagarapim ples na spolim Kristen laip bilong kantri. Ol samting olsem:

- Korapsen - trikim na stilim mani bilong pipel (Husat i mekim?: gavman, pablik sevis, skul, sios, bisnis na wanwan man na meri)

- Giaman - tanim tok na autim tok i no tru (long Konstitusen, long Lo bilong kantri, long lo bilong ples, na long Lo bilong God).
- Man i no sapatim na lukautim meri na pikinini bilong em. (marit na famili-laip i pundaun)
- Pait na bagarapim narapela - ol tribal-pait - paitim meri - kros-pait i kirap long ples - Polis i paitim man (ol violence);
- Ol pamuk sin, ol bikman i pulim na bagarapim ol yangpela, man i paulim meri long pamuk pasin, pilai nabaut long laik bilong wanwan, brukim marit;
- Komyuniti i no lukautim ol pikinini na yangpela (pikinini i nogat papamama o lain bilong lukautim ol);
- Ol sevis bilong gavman na bilong ol sios i go slek nabaut long kantri;
- Tingting i pas long mani tasol (mani em nupela god-giaman), na namba bilong ol turangu i wok long go bikpela;
- Westim mani bilong HIV/AIDS long kain kain samting na hapim o pinisim helpim-mani, na givim baksait na i no lukautim ol siklain na pikinini bilong ol.

Tasol wok bilong Ridima i stap tu na yumi lukim taim ol gutpela samting i kamap na i bringim blesing. Ol samting olsem:

- Tok i tru: Ol lain bilong

wold, na insait long PNG tu, i wok long tokaut ples kliia long ol sinpasin i stap long kantri;

- Kristen laip - gutpela marit laip - ol yangpela (yut) i traim best bilong ol long stap gut na wok wantaim komyuniti;
 - Marasin bilong strongim ol lain i gat HIV/AIDS i bikpela helpim tru!
 - HIV/AIDS Progem bilong helpim ol meri i gat bel (PMTCT) - na blesing i kam long marit bilong ol;
 - Ol liklik donor-lain i sapatim ol sik manmeri. (ol ovaseas lain na PNG tu)
 - Ol siklain yet olsem ol "pren" - "Friends"- lain i HIV pinis em wanpela i helpim narapela;
 - Gutpela manmeri i mekim gutpela pasin na i trai hat long sindaun gut a bel isi wantaim narapela;
- Dispela ol gutpela pasin i save strongim laik (love) na winim sin insait long kantri na kirapim pasin bel isi.

Sevia long 2010:

Jisas em Sevia bilong yu na mi long nau, Krismas 2010. Yumi laikim Saviour o nogat? Tasol, God em God bilong askim. Em i no fosim wanpela man o meri. God i save kam long wanwan na askim man pastaim. i olsem tok piksa i stap long Buk Baibel we Jisas i tok:

"Yu lukim mi! Mi sanap long dua, na mi paitim i stap.

Sapos wanpela man i harim maus bilong mi na i opim dua, orait bai mi go insait na mi stap wantaim em.

Na bai mi kaikai wantaim em, na em i kaikai wantaim mi." (Rev 3:20)

Jisas i laik kam insait long laip bilong yumi wanwan man na meri na long PNG wantaim.

Tasol, yumi man i ken opim dua na askim Jisas long kam insait long laip bilong yumi o yumi ken passim dua na tok maski! Sapos Jisas i kam insait, olsem Sevia, bai em i pinisim ol dispela pasin nogut i stap insait long kantri nau. Na, Jisas tu, bai strongim yumi long mekim gutpela pasin na sindaun gut na bel isi wantaim. Tasol, bekim bilong askim bilong Jisas i stap long han bilong yumi wanwan na long kantri wantaim.

Selebretim Krismas long 2010 i gat bikpela mining tru. Yumi selebretim Jisas i bin kamap man, bipo, hamas tausen yia i go pinis. Na yumi selebretim Jisas i kam insait long laip bilong yumi tude. Maranata! "Kam Lord Jisas!"

Gutpela taim bilong Krismas na Nupela Yia na bel isi bilong Krai i stap wantaim yupela!

Loya Naru peim hap skul fi bilong turangu Kokopo sumatin

JAMES KILA i raitim

WANPELA praivet loya, husat i bikpela gat han-mak pinis long planti ples insait long PNG long helpim wok bilong Kristen Sios i sori na i helpim wanpela turangu sumatin bilong Kokopo, Is Nu Briten provins.

Long Tunde, Disemba 28 bihain tasol long Papua Niugini i amamasim Krismas, loya Songan Kelly Naru i helpim turangu sumatin ya taim em i peim K1, 219 olsem hap skul fi bilong dispela boi na em i ken kisim gret 12 setifiket bilong em long Don Bosco Teknikal Institiut (DBTI).

Dispela sumatin Mitchell Lowon, husat i gat 20 krismas em bilong ples Vunamami insait long Kokopo distrik, Is Nu Briten provins.

Stori bilong Mitchell i gat sori na wari long en. Papamama bilong Mitchell i dai pinis na wanpela kandere meri i lukautim em long Mosbi.

Mama bilong em i bin dai long 2000 na papa bilong em i dai long 2001 na turangu i nogat lain long sapotim em. Mama i karim em las insait long famili we i gat 9-pela



NALU HELPIM: Strongpela Kristen loya, Kelly Naru i sainim sek long peim skul fi bilong yangpela sumatin, Mitchell Lowon, husat i pinisim skul long Don Bosco Teknikal Institiut long Mosbi. **Poto: James Kila**

pikinini, em 6-pela meri na tripela man. Ol bikpela susa na brata bilong em i gat famili bilong ol yet long lukautim na i no tingting tumas long helpim em.

Mitchell i pinisim gret 12 long Don Bosco Teknikal Institiut long

Gabutu long Mosbi. Tasol turangu i no kisim gret 12 setifiket bilong em bikos em i no pinisim skul fi bilong em. Narapela samting tu em Mitchell i bin lusim wanpela laibri buk bilong skul na skul i sasim long peim, tasol turangu nogat mani.

Olsem na skul i no givim em gret 12 setifiket.

Turangu dispela mangi i pilim hat tru. Tingting bilong em i paul olgeta na em i no save em bai kisim helpim long wanem hap tru.

Bihain long sampela taim em i lukim sampela stori long niuspepa long ol helpim Kristen loya, Mista Naru i bin mekim long ol sios grup insait long kantri, na em i raitim wanpela leta i go long Mista Naru.

Taim Songan Naru i kisim leta bilong dispela sumatin na i ridim, em i luksave stret olsem turangu dispela pikinini i nidim tru helpim na em i raitim leta. Insait long envelop Mitchell i putim leta skul i raitim long em na tu putim hamas em mas peim long laibri buk em i lusim.

Dispela leta bilong Mitchell i kirapim tru bel bilong Mista Naru bikos turangu i gat bikpela tingting tru long go het wantaim edukesen bilong em, tasol husat tru bai helpim em.

Insait long leta, Mitchell i tokaut olsem em i gat bikpela tingting tru long go het long skul long Maun Hagen Teknikal Koles long hevi disel fita. Dispela em driman bilong

em, na em i tok sapos Mista Naru i helpim em, em bai i no inap tru long lus tingting long Mista Naru long laip bilong em.

Mista Naru i raitim wanpela sek em mani mak olsem K1,219 na givim long Mitchell na em i karim i go long benk long putim long akaun bilong skul. Bihain em bai karim risit i go na kisim gret 12 setifiket bilong em.

Mitchell i tok olsem dispela helpim Mista Naru i givim em wanpela spesel Krismas presen tru em i no inap lus tingting inap em i bikpela man na tu oltaim long laip bilong em.

Strongpela skul toktok em Mista Naru i save givim olgeta taim em pasin bilong laikim na givim i mas stap oltaim long olgeta Kristen manmeri o pikinini bilong God.

Planti taim sampela man i save paitim bros na toktok tumas olsem ol Kristen, tasol pasin bilong ol long givim na helpim narapela husat i gat nid i no save stap.

Songan Naru i tok olsem pasin bilong laikim na givim bai lukim God i kapsaitim moa blesing long em.

Nupela yut trening kolis givim sans long ol yut

Paulus Tali i raitim

OL YANGPELA manmeri long Isten Hailans provins husat i nogat spes long go hetim skul bihain long Gret 6, 8, na 10 i gat sans long skruim skul bilong ol nau long wanpela nupela kolis.

Hailans Yut Trening Rihabilitesen Senta i kamapim wanpela nupela Kolis long Gonix long Goroka we em i nupela edukesen kolis we i givim sans long ol yut we i ting i nogat sans long skul laip bilong ol tai mol i no inap long go hetim skul long nomol edukesen sistem.

Dispela nupela kolis long Gonix i askim ol yangpela long go lukim ol lain long opis sapos ol i laik kisim wanpela kos we kolis i ofaim.

Michael Goro em Prinsipel bilong kolis i tok ol lain husat i gat laik long skul long dispela skul i ken go long opis long dispela mun (Janueri) na Februeri long rijista.

Ol kos na kos fi we kolis i gat long en na ol sumatin i ken kisim em long Akaunting na fi kolis i sasim emn K2,900. Ol narapela em long Etvans Kompyuta na K2,800 fi, MYOB v i gat K800 fi, Infomersen teknoloji i gat K3,500 fi long peim, Bisnis menesmen fi em K3,200, Sekreteriel em K2,000 na Seils na maketing em K2,300.

Sampela ol narapela kos skul ya i ofaim em long Diploma long Akaunting we ol sumaitn i skruim skul long yia pastaim bai kisim. Kos fi long dispela kos em K2,200. Ol narapela diploma kos fi bai go antap long K4,000.00 mak.

Polis sutim skul mangi

Andrew Molen i raitim

WANPELA hai skul mangi i dai bihain long wanpela man we ol i bilip i polisman, i sutim em long 6 Mail setelmen long Mosbi.

Dispela mangi, Mathew Yame, i gat 19 krismas bilong Chuave long Simbu provins i bin lusim narapela haus long setelmen na i bin laik go wokabaut bihain rot i go long haus taim tripela polis kar i stop na wanpela i kam aut na sutim em long bros bilong em wantaim pistol.

Dispela hevi i bin kamap long Sarere, Disemba 11 las yia bihain long sampela mangi bin digim graun long pasim ol hul long rot na askim ol manmeri long kar long tromoi sampela mani long ol.

Ol i bin mekim dispela long moning i go inap long apinun we ol i kirap na brukim glas bilong wanpela kar taim dispela kar i spit i go na i no stop na givim ol mani.

"Mi traime long stopim ol tasol ol i no harim tok," mama bilong Mathew, Grace Yame, husat i wanpela kaunsela bilong wod 13 long hap, i tok.

Em i tok pikinini bilong em i bin stap long haus taim dispela ol mangi bin sanap mekim dispela pasin long rot.

Famili bilong Yame i bilip dispela kar we ol mangi brukim glas bilong em i mas ringim polis na ol i kam bek bihain long apinun.

"Dispela ol polisman i luk olsem ol i dring liklik," Misis Yame i tok.

Em i tok tripela kar i kam stop sait long rot na wanpela man i go aut na wokabaut i go insait long



SORE: Anti bilong Mathew (lephan) i holim skul I.D poto bilong em na i krai long mama bilong em (namel) na papa, Mathew (sinia). **POTO: Andrew Molen.**

setelmen we ol manmeri bung i stap.

Long wankain taim, Yame i wok long lusim dispela hap na i wokabout makim man ya i go bilong wanem em i laik go antap long rot na wokabaut bihainim i go long haus.

"Man ya i karim bikpela gan long hap han bilong em tasol em i rausim liklik pistol aninit long siot bilong em na sutim Mathew klostu tru," Misis Yame i tok wantaim ai wara.

Tasol Mathew i no dai long hap, pen na sotwin i mekim em i kirap nogut na em i ron i go bek abrusim ol haus na i go pundaun sait long wara we em i dai na

mama bilong em i ron i kam painim bodi bilong em bihain.

Ol i kisim namba bilong ol dispela polis kar we i soim rejistresen namba bilong polis tasol dispela ol man i no werim yunifom na ol i spak na bikhet long ol manmeri sanap long stua sait long rot we ol i sutim mangi.

Mosbi Not is Lokol Level Gavman Kaunsil Presiden, James Mu i singaut long polis komisina long tok klia long wanem kain pasin ol opisa bilong em i mekim.

"Komisina na NCD komanda mas tokaut nau, wanem kain oda ol i save givim long ol wokman bilong ol?"

"Yu save tokim ol long sutim

kain kain man tasol o sekim ol na painim aut pastaim bipo yu holim ol," mista Mu i tok.

"Ol dispela polisman tu i no werim yunifom na ol i spak tu, yu save lukluk long dispela kain ol polisman tu?" em i tok.

Famili bilong Yame i putim ripot long 6 Mail polis pinis na i tok polis i noken haitim kain ol bikhet man olsem.

"Soim ol na mekim save long ol bilong wanem dispela ol polisman i no brukim lo," mista Mu i tok.

"Wanpela mangi dai nating nau long han bilong ol, Komisina i mas mekim wanpela samting long stretim dispela hevi bipo sampela moa manmeri dai nating gen," em i tok.

Mista Mu i tok famili bilong Yame nau i singaut long Polis long baim olgeta hevi bilong dai bilong em na tu balus tiket bilong karim bodi go bek long ples.

"Mi sapotim kaunsela bilong mi bilong wanem mi ting olsem polis i asua," em i tok.

Misis Yame i tok Mathew i pinisim gred 10 long Kila Kila sekenderi skul dispela yia na i winim spes long go skul long Mt Diamond long 2011.

"Em i gutpela mangi na i no save mekim kain bikhet pasin, mi save tokim em long skul strong na kamap wanpela enjinia bihain taim tasol dispela bai nogat nau," em i tok.

Mathew i gat wanpela bikpela susa na wanpela liklik brata.

Ol famili na komyuniti long 6 Mail i bung long haus krai stap nau.

Ol SVD long PNG i gat nupela Provinsel o bos

Pater Paul Liwun i raitim

STAT long dispela nupela yia, Januari 1, 2011, ol Divain Wod Misinari (SVD) long PNG i gat nupela Supiria o Provinsel o bos bilong ol. Nem bilong en em Pater John Mc Carthy SVD. Em i bilong kantri Ireland klostu long Inglan.

Em i bin kisim blesing long kamap pater long yia 1978. Na long yia 1979, em i bin kamap long PNG. Em i bin mekim wok misinari insait long Asdaiosis bilong Maun Hagen inap long 18-pela yia. Long Hagen em i bin wok long Sen Paul Peris long Hagen taun, long Ulga Peris, Koibuga, Minj na Tupa.

Taim em i mekim wok pater insait long Hagen Asdaiosis, ol i bin makim em i kamap Vais Provinsel inap long tupela taim. Pastaim em long taim bilong Pater Francesco Sarego SVD i



Pater John Mc Carthy SVD.

kamap Provinsel tasol nau, em i Bisop bilong Goroka Daiosis. Namba tu taim em long taim bilong nau i dai Pater Elmer Elsbern SVD.

Las peris em i lukautim insait long Hagen Asdaiosis em Tupa. Em i bin lusim Tupa na go long Kundiawa long yia 1996, taim ol i makim em olsem Vokesen Dairekta long kisim ples bilong Pater Rinus Pambut bilong Indonesia i bin dai long ka aksiden long ples bilong

em. Pater John McCarthy SVD i bin kamap Vokesen Dairekta inap long yia 2002.

Pinis wok olsem Vokesen Dairekta, em i go bek na wok long peris, tasol i no long Kundiawa o Hagen. Ol i bin makim em i kamap peris pris bilong Par, insait long Wabag Daiosis, Enga Provins. Tripela yia em i lukautim Par peris, na long yia 2008, ol i makim em i kamap rekta bilong Divine Wod Kolis long Bomana. Em i mekim wok bilong helpim na lukautim ol SVD Seminari i skul long Katolik Tiolojikel Institut o CTI long Bomana. Em i wok strong na wok bung wantaim ol sumatin na narapela wok-lain long Bomana long kamapim gutpela disiplin o ol sumatin i bihainim gutpela pasin insait long Divain Wod Kolis. Olsem na planti Seminerien i pilim sori tru bikos em i lusim ol na kamap Provinsel bilong ol SVD long

PNG.

Long mun Julai 2010, taim Pater John i stap long kantri bilong em long malolo, i bin gat toksave i kam long Jeneral Supiria long Rom bai Pater John McCarthy i kamap nupela Provinsel bilong SVD long PNG stat long 2011 i go inap long 2013.

Long Desemba 28, 2010, em i lusim Divain Wod Kolis long Bomana na i go long SVD Sentral Haus long Madang. Na long de 29 Disemba 2010, i bin gat henova tekova we pater i bin holim dispela wok i givim wok i go long nupela Provinsiel. Long Nu Yia Januari 1, 2011, em bin kamap fultaim Provinsel bilong SVD long PNG.

Taim mi toktok wantaim em long Mobail fon, em i tokim mi olsem: "Mi gat bilip long wok bilong Divain Wod Misinari (SVD) long PNG na mi gat bilip tu long Sios insait long PNG".

Holi Famili peris Kuriva i selebretim pestode

Pater Paul Liwun SVD i raitim

Long Sande Disemba 26, 2010, Holi Famili Peris Kuriva i stap long Hiritano Haiwe i kamap laip tru. Em i spesel de bilong peris, we ol manmeri bilong Kiriva i kam bung long misin stesen na selebret wantaim long pestode bilong peris bilong ol. Ol i redim naispela lotu, sisinging na danis wantaim.

Selebresen bilong dispela yia i kamap narakain tru. Dispela em bikos Pater Justine Nenat SVD, peris pris bilong Kuriva i bin invaitim o askim long kam stap wantaim ol, Embaseda bilong Indonesia long Pot Mosbi, wantaim ol Katolik Famili bilong Embasi i kam na stap wantaim ol long dispela spesel selebresen.

Peris pris, Pater Justin i bin go pas long santu Misa na Pater Freddy Jehadin SVD, prifek bilong Divain Wod Kolis Bomana i bin givim homily o tok skul.

Em i Pestode bilong Holi Famili, olsem na long skul bilong em, Pater Freddy i bin givim sampela tok stia long strongim marit na famili laip. Em i tok: "Long kamapim gutpela famili, i mas gat gutpela komyunikesen namel long papa na mama na pikinini.

I mas gat taim bilong sindaun wantaim, stori wantaim,

prea wantaim na kaikai wantaim. Sapos i gat dispela kain pasin i stap strong, famili bai kamap gutpela na pulap long amamas".

Taim ol i givim taim long em long toktok, Andreas Sitepu em Embaseda bilong Indonesia i tok amamas long kam na selebretim Krismas na pestode bilong peris wantaim manmeri bilong Kuriva. Em i tok: "Krismas em i taim bilong selebret wantaim. Maski wari long wanem lain yu kam long en. Noken wari long level bilong famili na ples bilong yu".

Em i mekim tok olsem bikos taim Maria i karim Jisas long Betlehem, i bin bungim olgeta wasman bilong sipsip i kam long kain kain lain bilong Israel na tu Jisas i bin bringim manmeri bilong ausait long Israel tu i bin kam na selebretim o lukim em.

Olsem na em i tok gen: "Wanem samting yumi selebretim tude em i olsem tingim bek bilong wanem samting i bin kamap 2010 yiai i go pinis.

Bikos yumi bung long Kuriva peris, yumi kam long kain kain ples na kain kain kantri na kain kain kalsa. Yumi bung wantaim bikos Jisas i bin mekim yumi i kamap wan".

Embaseda i tok moa long wok misin bilong em long PNG i bilong lukautim na strongim gutpela poroman

namel long PNG na Indonesia long kain kain wok. Namba wan samting em bilong kamapim gutpela sindaun na amamas namel long manmeri bilong dispela tupela kantri, Indonesia na PNG.

"Dispela misin em i go wantaim spirit bilong Krismas long promotim pis o gutpela taim, bung wantaim long spirit bilong brata na susa namel long ol pipel, manmeri bilong God. Wantaim Spirit bilong Krismas, mipela i kam long lotu na amamas wantaim yupela long dispela selebresen".

Long toktok bilong em, Pater Justin i bin tokim ol pipel bilong Kuriva lon g givim sapot na wok bung wantaim long strongim peris olsem wanpela famili. Wan wan memba bilong famili i mas kontibutim taim na strong bilong em long developim peris na mekim em i kamap laip olgeta taim.

Selebresen bilong peris i go het wantaim bung kaikai wantaim olgeta pipel bilong Kuriva peris. Ol manmeri i soim amamas bilong ol long serim kaikai na stori na danis wantaim.



Gutpela tingting bai givim yu gutpela sindaun

GUTPELA tingting bai save givim biknem long ol manmeri husat i bihainim Bikpela, na em i lukautim ol lain i wok long painim em. Ol manmeri i save laikim gutpela tingting na tu, ol i laikim Bikpela (God), na ol manmeri i kirap hariap long painim gutpela tingting, em bikpela amamas bai pulap long laip bilong ol.

Ol manmeri i holimpas gutpela pasin, ol bai gat biknem na Bikpela bai mekim gut long ol. Ol manmeri i liptimapim nem bilong gutpela tingting, ol i liptimapim nem bilong God bikpela i Holi olgeta. Na ol manmeri i laikim gutpela tingting, orait, God i laikim ol tu. Baibel tok olsem long 1Korin 8:3. Tasol sapos wanpela man i givim bel bilong em long God, orait God i save gut tru long dispela man. Ol manmeri i harim tok bilong God bai ol i kamap lida bilong ol pipel. Husat i putim yau long Bikpela em bai sindaun gut. Sapos ol manmeri i bilip long Bikpela, ol bai gat gutpela tingting, orait ol bai kisim na holim blesing bilong God. Na ol lain pikinini i kamap bihain, ol bai kisim blesing.

Pikinini, sapos yu bihainim gutpela tingting, bai yu save long olgeta gutpela tingting na rot bilong wokabaut. Bai yu save long bihainim ol gutpela na stretpela pasin na long mekim wankain pasin long olgeta man. Bai yu kisim planti gutpela tingting long God Papa na bai yu belgut long gutpela save bilong yu, bikos God i stap wantaim yu.

Pasin bilong tingting gut bai banisim yu na gutpela save bilong yu, na bai no bihainim ol manmeri i save mekim pasin nogut na mekim tok i no stret. Ol dispela man i save lusim stretpela rot na i wokabaut long rot i tudak na bilong dai tasol. Gutpela tingting bai givim yu gutpela sindaun wantaim manmeri bilong yu.

Pikinini, mi laik skulim yu nau na yu noken lusim tingting long dispela tok, nogat! Oltaim yu mas tingim gut. Sapos yu bihainim dispela tok, bai yu stap longpela taim long graun na bai yu sindaun gut tru.

Yu noken lusim pasin bilong givim bel bilong yu long God na ol arapela manmeri bilong em. Sapos yu mekim olsem, orait God bai i laikim yu na ol manmeri tu bai laikim yu. Na wok bilong yu bai i kamap gutpela na sori bilong God i ken stap wantaim yupela olgeta manmeri bilong em.



Pater Justin Nenat SVD na Pater Freddy Jehadin SVD long baksait i wokabaut i go long altar. (Photo: Sr. Dorothea RVM)

Ol Navunaram Yunaitet Sios meri i singsing long welkamim nupela yia

Nicky Bernard i raitim

TAIM ol bikipela seremoni o wok i kamap, ol meri i save stap long franlain long redim ol samting na lukim olsem ol samting i kamap tu. O long lukim olsem ol wok i go gut na pinis gut tu.

Wanpela long ol samting we ol Yunaitet Sios Wimens Felosip (UCWF) grup bilong ples Navunaram long Is Nu Briten provins i bin mekim long amamasim Nu Yia na kirapim wok bilong ol em long singim ol kwaia singsing long ples insait long ol grup bilong ol.

Ol meri na ol mama i bin bruk long 10-pela grup na singsing long welkamim Nu Yia 2011 na tu, wokim fan resing long sapatimron long ministri bilong ol.

Tresera bilong UCWF em Dorish Tabun i tok ol eksekutiv bilong ministri i bin tok orait long ol long raun long ol ples na singsing long wanem, ministri bilong ol i bin yusim mani long planti samting las yia na nau ol i mas kamapim gen mani long go hetim ol wok na program bilong ol.

Samting olsem 50 meri i bin stap insait long grup we i bin raun na singsing long welkamim nupela yia na tu, kirapim fan resing wok bilong ol.



HATWOK I KARIM KAIKAI: I no isipela wok long stretim ol sel olsem wokim ol hul long wanwan sel na putim long rop long kamapim ol rop selmani.



REDIM SELMANI LONG KASTOM WOK: Lapun mama Gelia Kamo i holim ol selmani em i stretim na redim taim pikinini meri bilong em, Rose Tule, husat i helpimn em i sindaun long baksait i stap. Potos: Nicky Bernard

Sel Mani stap strong yet

Nicky Bernard i raitim

PASIN West tasol em dispela hap tok yumi planti i save lukim long ol siot o singlis ol i prinim, tasol yumi bai no inap save long sampela kastom bilong Wes Nu Briten.

Lapun mama Gelia Kamo na pikinini meri bilong em, Rose Tule, em tupela bilong liklik ples Vogevoge long Wes Nu Briten i lusim Wes Niu Briten na kam long

Mosbi long helpim pikinini man na brata long mekim selmani bilong kastom wok bilong ol.

Pikinini man bilong lapun mama Gelia em Mista Kamo i bin baim tiket bilong mama na susa bilong em, Rose, long kam long Mosbi long stretim selmani tasol.

Dispela liklik kastom wok bai kamap long mun Februerueri olsem na mama Gelia na pikinini meri bilong em i wok long hari-apim dispela wok bilong sel mani.

“Sel mani em bikipela samting long mipela ol Wes. Dispela selmani mipela save baim meri sapos em bilong Wes Nu Briten, na tu mipela save stretim ol pikinini bilong mipela.” Rose i tok.

Dispela selmani we lapun mama Gelia na Rose I mekim em I bilong pikinini man bilong lapun mama Gelia em bai kisim ol pikinini bilong em go long Wes Nu Briten long stretim ol long pasin Wes tasol.



PASIN MARIMARI: Pasin bilong helpim narapela i save stap long yumi Papua Niugini stret. Na Krismas em i gutpela taim long tingim na givim presen i go long wanpela narapela na moa yet, long ol lain i slip long haus sik, haus kalabusna ol narapela turangu lain. Olsem ol dispela Pot Mosbi Tolai Adventis komyuniti i soim. Olgeta potnait wik, ol i save go lukim ol mama husat i sik o kisim operesen o i gat sik bilong ol mama na ol i save givim kaikai long ol. Long dispela Krismas ol bin mekim bikipela mumu bilong ol Tolai stret na kisim i go long wod bilong mama long Pot Mosbi Jenerel Haus sik long Mosbi.



KISIM, EM MUMU YA: Alvina Levi na Natasha Michael i stap namel long ol papamama bilong ol taim ol go lukim ol sik mama. Piksa i soim tupela i givim mumu kaikai long Dianne Kautat em meri Milen Be husat kisim operesen na stap long wod. Ol Potos: Nicky Bernard

Raun Lukim ol Meri na Pikinini:



LOGOS: Dispela mama long Barakau Viles i danis long wanpela resis bilong string ben long Barakau long amamasim Krismas na Nu Yia.



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Kwinslen kisim taim long haiwara

HAIWARA insait long Not is stet bilong Kwinslen (Queensland) long Australia i wok long givim bikpela bagarap long samting olsem 200,000 pipel.

Ten-pela pipel i dai pinis insait long dispela mun i kam go pinis na ol i bilip olsem kos bilong dispela birua i stap long planti bilion dola long sait blong industri na wok didiman.

Haiwara i pasim tu 'coal o kol prodak-sen' na dispela i min olsem kos bilong kol prais long wol bai go antap.

Na ol pipel bilong Rockhampton taun i redi long bungim Fitzroy Riva taim wara mak i abrusim banis i go antap long 9-point4 mita sampela taim long tumora.

Nu Silan bai salim wanpela menesment tim i go long Kwinslen

Nu Silan bai salim wanpela Sivil Difens Imejensi menesmen tim long helpim ol atoriti wantaim bikpela haiwara long Kwinslen.

Dispela helpim i kamap bihainim wanpela toktok bung namel long Praim Minista bilong Australia na Nu Silan.

Dominique Schwartz i ripotolsem Foren Minista bilong Nu Silan, Murray McCully, i tok Australia i save givim helpim bilong em ol taim. I no long taim i go pinis, em bin helpim wantaim long bikpela Pike River main disasta o birua.

Em i tok ol samting olsem 10 na 15 pipel bilong Sivil Difens tim bai i go long helpim ol Kwinslen atoriti long dispela bikpela hevi.

Dispela Nu Silan Sivil Difens woka i bin hap bliong bikpela helpim bihainim bikpela graun guria long Christchurch long yia i go pinis.

Ol i bilip olsem ol bai kamap long Australia insait long dispela tupela de i kam.

Ol beng roba o stilman long Argentina i digim tanel na stilim mani

OL stilman o ol beng roba insait long kantri Argentina long Saut Amerika i bin digim wanpela bikpela 'tunnel' o hul i go insait long wanpela beng seif insait long kapitel Buenos Aires na stilim samting olsem 100 sefti diposit buk.

Nick Olle i ripot olsem lanti handret ol pipel, husat i gat akaun long hap i bin banisim beng brens long Buenos Aires na askim long ol i mas givim ol infomesen sapos 'saefi bokis bilong ol, i stap seif o nogat.

Ol bin painim aut long dispela stil taim ol wokman bilong beng i go bek long wok bihain long nupela yia wiken.

Ol stilman i bin yusim dispela tanel



KISIM BAGARAP LONG HAIWARA: Dispela em wanpela longol planti pipel long Kwinslen i kisim bagarap taim hai wara i karamapim ples na ol narapela samting bilong ol. AAP foto

long go insait long Banco Provincia brens na aut gen taim ol i digim 30 mita, stat long wanpela haus klostu long beng i go insait long benk.

Ol i ting dispela ol stil man i bin rentim dispela propeti klostu long beng 6-pela mun samting na stat long dispela taim, ol bin digim hul i go insait wantaim lait na ventilesen ea o win.

Ol beng opfisa bai no tok aut long ol wanem samting ol bin stilim longwanem, em i tambu o 'confidential' long tok aut long wanem samting i stap insait long ol sefti diposit bokis.

Bikpeal ren na haiwara i hamarim sautis Filipins

BIKPELA ren insait long is, sentrel na sautis hap bilong Philippines i kamapim pinis traipela haiwara na giraun buruk.

Samting olsem 12-pela pipel i dai na planti moa ol i lus, Na sampela hap bilong Butuan Sitalong saut bilong kantri em wara i karamapim.

Long Manila, Shirley Escalante i ripot olsem Presiden Benigno Aquino i mekim wanpela 'appeal' o singaut i go long pablik long helpim planti tausen ol pipel husait i bungim hevi long dispela taim insait long 12-pela provins bilong kantri.

Ol lokal gavman opisel i statim pinis long givim ol rilif saplai i go long ol pipel, tasol ol i ting dispela bai i no inapim ol long ol dispela long ol de i kam.

Ol man save long 'weather' o taim bilong san na ren i tok dispela bikpela ren i kamap long ol sanis bilong klaimet.

Ol tu i kenselim ol domestik flait o ron bilong balus i go long ol ples insait long dispela rijen.

Fiji polis bai givim bikpela mekim save long ol pipel i brukim lo bilong mekim hombru

POLIS bilong Fiji i givim wanpela tok lukaut long 'homebru' em ol pipel yet i mekim long han na bihain salim ol.

Tokman em Atunaisa Sokomori i tok em i kisim sampela ripot long ol hombru we ol i wok long salim insait long ol vilis.

Inspektar Sokomori i tok polis i redi long hamarim dispela bisnis bikos ol i brukim lo. Na dispela bisnis i save kamapim planti hevi olsem ol pait na trabel na tu domestik viaolens.

Em i askim strong ol vilis bikman na meri long helpim polis long painim ol pipel husat i save mekim dispela ol dring na husat i save salim ol.

Wanpela polisman i dai long bom pairap long Kabul

WANPELA polisman i dai na narapela i kisim bagarap taim wanpela bom i bin pairap insait long namel bilong kapitel siti bilong Afganistan, Kabul.

Dispela pairap i kamap klostu long defens ministri, 200 mita samting long wanpela polis pos.

Em i bin kamap taim wanpela opisa i bin traim long rausim fius long bom. Pastaim long em, em i bin rausim ol pipel long muv i go aut long dispela eria.

Ol i no klia sapos dispela pairap i bin stap bihainim planti yia blong pait insait long Afganistan o ol paitman no laikim gavman i bin haitim long hap.

Tupela wik i go pinis, tupela suisait boma i bin targetim wanpela ami bas bilong Afganistan we ol i bin pairapim bom na kilim 5-pela militeri opisa.

Tok lukaut long pairap bilong Manam ailan

LONG Madang Provins bilong Papua Niu Gini, ol i tokim ol pipel long lukaut long ol pairap bilong Manam ailan volkeno o maunten paia.

Volkenik Obsevatori ong Rabaul i givim namba 3 level tok lukaut bihain long ol i pairap bilong mauten namel long Krismas na Nu Yia.

Post Courier niuspeipa i ripot samting olsem 1-tausen pipel bilong ailan i tok ol i mas helpim ol long lusim ailan i go long mainland o bikples.

Ol Gavman opisa long Manam i wok long glasim dispela hevi, we ol i redim wanpela bot long karim pipel aut sapos ol i lukim parap bai kamap bikpela.

Pacific BEAT

4. 5. 6am & 4pm. 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Jada 2011

Amamas long nupela yia wantaim yu

WELKAM long 2011 na yumi olgeta amamas long bung gen long nupela yia wantaim nupela de na nupela lukluk long wanem samting yumi laik mekim.

Nupela yia em taim bilong mekim sampela samting we i mas go het long yumi ken painim gutpela kaikai bilong en.

Taim nupela yia i stat, yumi harim sampela nius nogut i kamap pinis long ol wantok bilong yumi long Sauten Hailans we ol papa-graun tru tru i no kisim dispela LNG mani bilong ol. Em ol ausait lain na sampela rong lain wantaim bisnis bilong ol i kisim ol dispela mani long Mosbi. Em ol kain ripot yumi no laik lukim o harim long dispela yia.

Yumi ritim olsem Oposisen i laik kamapim vot i nogat bilip long Gavman long neks wik Tunde taim Palamen i bung long holim vot bilong makim nupela Gavana Jenerel. Palamen i gat 18 mun tasol i stap long



nesenel ileksen i stat long Julai 2012.

Yumi harim olsem Prais-Minista Sir Michael Somare i lusim sia bilong em na nau ol makim memba bilong Wabag Sam Abal olsem ekting Prais Minista. Kainkain bikpela senis i kamap long las yia we yumi lukim na harim.

Bikpela projek bilong LNG i kamap na mekim olgeta manmeri i pilim olsem mani bai kapsait long Papua Niugini we olgeta pipel bai poket pulap long mani.

Em ol sampela samting we i kamap tasol yumi mas traim long stretim na stiaim ol dispela samting bai ol ken ron stret long gutpela rot na gutpela pasin long yumi kisim gutpela amamas long ol.

Nau em 2011 na yumi mas putim was long ol

memba bilong yumi husat bai mekim planti samting olsem ol projek na sevis long distrik bilong ol. Yumi ken lukim olsem 4-pela kris-mas go pinis ol no mekim planti samting o soim ol mani bilong mekim wok. Ating ol bungim i stap long kamapim ol las minit wok bilong grisim na pulim ai bilong ol pipel long dispela taim.

Lukaut bikos sampela bai baim ol kar, sip bilong mekim bisnis na sapos ol lus long ileksen, ol bai kamap papa long ol dispela bisnis.

Nau em planti memba bai mekim ol kempen wantaim mani na projek long winim gen sia bilong ol long 2012 nesenele ileksen. Noken ai pas, lukim na skelim.

Tingim, mani ol yusim o tromoi long mekim wok em mani bilong yumi na yu gat rait long kisim dispela sevis o projek bikos em mani bilong yu. I no poket mani bilong memba.

Dispela kain samting i

noken grisim bel bilong yu long votim em gen long neks yia. Ileksen em lo i tok, yu mas makim man long save na tingting bilong yu yet.

Dispela yia em taim bilong sevim gut mani na noken tromoi nabaut nabaut long ol samting we i nogat gutpela kaikai na mining long ol. Sevim gut mani bilong kamapim gutpela amamas na helpim long yu na famili bilong yu.

Wokim gutpela haus, baim ol gutpela samting na mekim sampela liklik wok bilong pulim liklik mani kam bek long strongim sindaun bilong yu na famili.

Mi save planti bilong yupe-la i mekim promis long niu yia long lusim sampela samting na mekim sampela nupela samting.

Mi bilip bai dispela promis bilong yu ken wok gut na painim gutpela sindaun na amamas.

Hepi Niu Yia.



Zibe no save yet long hevi bilong manmeri

MANMERI long Papua Niugini oltaim i save pilim, lukim o harim olsem marasin i sot o arapela samting olsem bed, o wod i pulap long ol haus sik long kantri.

O ol hap bilong haus sik i olpela na i brukdaun na i laikim helpim bilong gavman.

Tasol mipela i laik save Minista bilong Helt, Sasa Zibe, i save long dispela ol hevi o nogat.

I luk olsem em i ai pas, yiau pas o maus pas na olsem em i no inap long mekim wanpela samting.

Sapos i go long Mosbi Haussik, bikpela haus sik long kantri, wanpela bai i no inap long bilipim olsem dispela haus sik klostu long dua bilong Nesenel Gavman i nogat inap ol samting bilong sapatim laip bilong ol sikmanmeri.

Na i gat stori olsem long imejensi wok sampela sik manmeri dai bikos nogat dokta i stap bilong lukim ol.

Na long Mosbi Haus sik mog, hevi i stap yet. Nogat nupela jenereta na planti ol bodi i stap insait i sting na smel.

Wanem taim gavman bai luksave long stretim dispela ol hevi! Dispela i sori stori long gavman husat i tok em i kamapim gutpela man na Dipatmen we i tok em i kamapim gutpela Helt Plen.

Sapos dispela ol toktok bilong gavman i tru, ol pipel i wet yet long lukim kaikai bilong ol toktok bilong em.

Na long disisen bilong kamapim Pasifik Medikal Senta (PMC) Haus sik long Bautama, Sentral Provins planti toktok i kamap yet olsem dispela disisen i no gutpela.

Dispela em bikos planti ol haussik long rurel na eben senta i nogat marasin, i bruk daun na ol wokmanmeri i nogat gutpela haus long stap na mekim wok.

Na Minista sapos em i gat save o nogat, i go het long mekim nara-pela samting.

Sapos em i gat hevi long bringim gutpela sevis i go long ol manmeri wanem taim em bai stretim ol taim em i kamapim PMC long wankain taim?

Gavman i gat mani bilong strongim sevis na bringim i go long ol manmeri na i nogat inap mani long kamapim ol nupela projek olsem PMC.

Profesa Dokta Glen Mola bilong Medikal Skul long Yunivesiti bilong Papua Niugini i givim semina long kamap bilong PMC long Nesenel Risets Institut (NRI) long Mosbi long klostu pinis bilong las yis i tok i gat bikpela ol askim i stap long kamap bilong PMC.

Dispela ol askim em:

- KAMAP bilong dispela haus sik i no inap stretim ol eid pos na haussik long kantri na i no inap long helpim gavman long baim marasin long ol manmeri;
- KAMAP bilong dispela haus sik i bihainim laik bilong wanpela man na i no long Helt Dipatmen na sekta;
- KAMAPIM PMC i tingting bilong wanpela pravit man long Amerika em Minista i askim Gavman long yusim PNG mani long sanapim;
- STAP na ol rum insait long dispela haus sik bai olsem ol rum insait long ol bikpela hotel olsem Crowne Plaza long Mosbi;
- DISPELA haus sik i bilong ol liklik lain manmeri husat i gat mani;
- JENERAL pablik bai nogat sans long kisim sevis long kain haus sik olsem.

Sapos kain man olsem Profesa Mola husat i stap wok wantaim pablik helt long planti yia na i save gut long helt sistem i mekim dispela ol toktok, wanem samting moa gavman bai gat long salens toktok bilong em.

Em i taim nau long gavman i mas harim toktok bilong em.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Neville Choi

Published at Section 58, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Krismas na Niu Yia potos





Program bilong Wanwan De

Mande - Fraide

6am - 10am - Sankamap show - Host: KAS.T
 6:15am - Komuniti Notis Bod
 6:30am - Nius Hetlains / Bondei grittings
Trukai Rais - GES FAIA KOMPETISEN
 6:45am - Niuspepa Hetlains
 7:00am - Major Nius Bulletin - YUMIFM Nius Senta
 7:15am - Toktok sapotim LO na JASTIS Sekta
 7:30am - Trukai Rais - GES FAIA KOMPETISEN
 8:00am - Major Nius Bulletin - YUMIFM Nius Senta
 8:15am - Stori b'long Skelim Tingting
 8:30am - Trukai Rais - GES FAIA KOMPETISEN
 9:00am - Nius Bulletin - YUMIFM Nius Senta
 9:15am - Luksave long Komuniti (Redio Pilai)
 9:30am - Trukai Rais - GES FAIA KOMPETISEN

9:45am - YUMI PAINIM WOK Segment
 10:00am - Nius - YUMIFM Nius Senta
 10am - 2pm - Monin Trek na Belo Pack - Host: VAVIESSIE
 10:10am - Lukatim yu yet - Helt toktok - RH Hyper Mart
 10:45am - YUMI PAINIM WOK Segment
 11:00am - Nius - YUMIFM Nius Senta
 11:10am - Cont'd - Lukauti yu yet - Helt toktok
 11:30am - Nius Hetlains b'long Belo Taim
 12:00pm - Major Nius Bulletin - YUMIFM Nius Senta
 12:10pm - BELO Taim - wantaim sapot b'long TELIKOM
 12:15pm - Komuniti Notis Bod
 12:20pm - BELO Taim - wantaim sapot b'long TELIKOM
 1:00pm - Nius - YUMIFM Nius Senta
 1:10pm - BELO Taim - wantaim sapot b'long TELIKOM
 2:00pm - Major Nius Bulletin - YUMIFM Nius Senta
 2pm - 6pm - Avinun Draiv Taim - Host: Enjo Dabix
 2:00pm - 4:00pm (Tunde / Fondei) TOKAUT TOKSTRET
 2:45pm - YUMI PAINIM WOK Segment
 3:00pm - Nius - YUMIFM Nius Senta

3:10pm - Avinun cruz
 4:00pm - Nius - YUMIFM Nius Senta
 4:10pm - "FOAPELA KAM GUD LONG 4"
 4:30pm - Nius Hetlains
 4:45pm - YUMI PANIM WOK Segment
 5:00pm - MAJOR NIUS BULLETIN - YUMIFM Nius Senta
 5:10pm - 6:00pm - FLAME KULCHA (1 hr) listeners request
 6:00pm - MAJOR NIUS BULLETIN - YUMIFM Nius Senta
 6 - 7pm - Maggi noodles request aua
 6pm - 00am - NAIT BEAT - Host: ANGRA KENNEDY
 6:10pm - 7:00pm Mun kamap sho
 6:45pm - Komuniti Notis Bod
 7:00pm - 9:00pm - COCA COLA GARAMUT
 9:00pm - 00am - Nait Beat - Isi Cruz long nait
 00am - 6am - BRUKIM TULAIT SHOW - Host: Papa Raegs / Sally / Nenge
 00:00 - Early Monin Taim Cruz (ol lain brukim tulait shift)
 - Miusik / Request / Tok pilai
 - Kipim Kampani long ol nait shift.

Weekend Shift - Saturday & Sunday
 6:00am - 11:00am - Wiiken Sanrais
 6:30am - Komuniti Notis Bod - Bondei grittings
 7am - 9am - Wiiken Spots
 9am - 11am - Monin Raun
 11am - 1pm - National Weekly Hit Parade (Host Kas.T)
 2pm - 6pm - Sarere Avinun Draiv
 6pm - 00am - Nait Beat (Host Angra Kennedy)

YUMIFM POROMAN TEAM:
 Turner (KAS.T) Arifae - Team Leader / Program Director
 Angra KENNEDY - Senior Announcer
 Sinimil (Vaviessie) Philipo - Promotions Co ordinator
 Papa Raegs - Announcer Nenge Neings - Announcer
 Enjo Dabix - Announcer Selestine Sally Sino - Announcer

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Helt
 8.15PM Musik
 8.30PM NUIS
 8.40PM Spots Riplei
 8.55PM Musik
 9PM Stesen Pas

TUNDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Mama Graun
 8.15PM Musik/Spots
 8.30PM NUIS
 8.40PM Helt Riplei
 8.55PM Musik
 9PM Stesen Pas

TRINDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Focus
 8.15PM Musik/Spots
 8.30PM NUIS
 8.40PM Mama Graun Riplei
 8.55PM Musik
 9PM Stesen Pas

FONDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Youth
 8.15PM Musik/Spots
 8.30PM NUIS
 8.40PM Focus Riplei
 8.55PM Musik
 9PM Stesen Pas

FRAIDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Wantok
 8.15PM Musik
 8.30PM NUIS
 8.40PM Youth Riplei
 8.55PM Musik
 9PM Stesen Pas

SARERE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Wantok
 8PM Lokal Ben
 8.30PM Nius
 8.40PM Musik/Chit Chat
 9PM Stesen Pas

SANDE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Famili Blong Serah (Redio Plei)
 8PM Lukluk Bek Long Wik
 8.30PM Nius
 8.40PM Musik/Chit Chat
 9PM Stesen Pas

Raun wantaim Wantok kru ...

Paia Woks long Lamana pulim Mosbi siti

Nicky Bernard i raitim

OLGETA pinis bilong yia, Lamana save kam gut tru. Planti manmeri long siti i save resis long kisim ples insait long dispela hotel, maski ol go long pati long pinis bilong Yia, ol mas go hariap long kisim ples.


Ol rum bilong ol tu i save pulap long ol famili long Krismas na

Nu Yia tu. Lamana Hotel em wanpela hotel long kantri we em save gat paia woks (fire works) o paia ol save sutim go antap na save lait na mekim kainkain kala nap les i save luk-nais.

Long amamasim nupela yia, Lamana i bin kisim sampela danis lain bilong kantri Brasil kam mekim danis bilong ol long hotel long amamasim

ol kastoma bilong em, na tu long welkamim nupela yia.

Ol ges o ol lain i slip long Lamana Hotel i bin amamas long lukim bikpela naispela paia woks Lamana bin kamapim, ol publik manmeri na pikinini husat gat kar tu bin kam pulap long ausait long rot na lukim dispela paia woks so.



93.5FM YUMIFM National Weekly Hit Parade:

Sponsor: Digital - bigger, better network.

Produced & Host by: Katy

Station: Talaga Sophie & Foreman Crew

Week Ending: Saturday - 08th January 2011

Week Before	Last Week	This Week	Charting Song:	Artist:
1	1	1(3)	Invisible Love	Jay West
2	2	2(6)	Always	K Daman
3	3	3(4)	Highway 17	K Daman
4	4	4	Sim Carol	Sau Langa
5	5	5	Name Mo	Roggie
6	6	6	Weak	Talk One 9
7	7	7	South Pacific Beauty	Akay 47 ft Hanley Logson Razzam
8	8	8	Nigib SSM	
9	9	9	Never Fade Away	Talk One 9
10	10	10	Andoi Hui Yu	Alan Naku ft DJ AAR
11	11	11	Faithful	Garry Vaitua
12	12	12	Mambo ID	Admiralty X
13	13	13	Marsani	Nigama
14	14	14	Avaleva Thao	Vigintu
15	15	15	Simbu Special	K Daman
16	16	16	Nimo	Mogai
17	17	17	Burakim Lewa	Sad n Barst
18	18	18	Kiel O	Chanuel X Crew
19	19	19	Italia	Nigama
20	20	20	Janara	Seris Maha ft Eljay
Song In:	Nimo			Mogai
Song Out:	Janara			Seris Maha ft Eljay
	Abot			Choking Band
	Lava			Roggie ft Ralphy & Georgina



Antap: Paiawoks bilong Lamana Hotel pairap long niu yia 2011.

Daunbilo: Ol dansas bilong Brazil i amamasim ol manmeri long Lamana long Nius yia stret.

Ol poto: Nicky Bernard

EMTV Television Guide

FONDE, JENUERI 6 2010		(SERIES PREMIERE)		HOME VIDEO SHOW SUMMER SERIES		11.30PM G NATIONAL EMTV NEWS REPLAY	
5.00AM	G ENJOYING EVERY DAY LIFE with JOYCE MEYER Religious Program	9.00PM	PG CRUSOE (MOVIE LENGTH)	7.27PM	G EMTV TOK SAVE	7.30PM	G SATURDAY FAMILY MOVIE: CHARLIE & THE CHOCOLATE FACTORY
5.30AM	G TODAY	10.30PM	G NEWS REPLAY	8.00PM	PG RPA #19	7.30PM	G CHARLIE & THE CHOCOLATE FACTORY
9.00AM	G FIFTH TEST	11.00PM	AUSTRALIA NETWORK	9.00PM	PG EMERGENCY #8	7.30PM	G Tim Burton brings his imaginative style to the much loved Roald Dahl's classic about eccentric chocolatier Willy Wonka and Charlie, a good-hearted boy from a poor family who lives in the shadows of the Wonka's extraordinary factory. Five lucky children world-wide have the change to win a golden ticket which would enable them to experience the mind-blowing delights and treasures behind the gates of the legendary factory. Charlie is drawn into Wonka's scrumptious world when he finds a golden ticket. Stars Johnny Depp, Helena Bonham Carter, Freddie Highmore and Noah Taylor.
11.30PM	G THE CRICKET SHOW	FRAIDE, JENUERI 7 2010		9.30PM	PG SUDDEN IMPACT #1/1	8.00PM	PG SUPERSTARS OF DANCE (2-hours)
12.00PM	G AUSTRALIA v ENGLAND .continues...	5.00AM	G ENJOYING EVERY DAY LIFE with JOYCE MEYER Religious Program	10.00PM	PG SEND IN THE DOGS #01	8.30PM	PG SUNDAY NIGHT MOVIE: PRIME - (2005 When Rafi a 37 year old single woman meets David, a 23 year old painter, it's love at first sight. But that love gets complicated when Rafi discovers that
5.29PM	G EMTV NEWS UPDATE	5.30AM	G TODAY	10.30PM	G LOVE PATROL #2/01	7.00AM	G HILLSONG
5.30PM	G MILLIONAIRE HOT SEAT	9.00AM	G FIFTH TEST	11.00PM	G EMTV NEWS REPLAY	7.30AM	G AUSTRALIA NETWORK.....
6.00PM	G NATIONAL EMTV NEWS	11.30PM	G THE CRICKET SHOW	11.00PM	G NATIONAL EMTV NEWS REPLAY	5.00PM	G JAPAN VIDEO TOPICS
6.30PM	G A CURRENT AFFAIR	12.00PM	G AUSTRALIA v ENGLAND .continues...	12.20PM	AUSTRALIA NETWORK	5.30PM	PG THE GARDEN GURU
7.00PM	PG RBT	SARERE, JENUERI 8 2010		2.59PM	AUSTRALIA NETWORK	6.00PM	G NATIONAL EMTV NEWS
7.30PM	PG RAIT MUSIK	5.29PM	G EMTV NEWS UPDATE	3.00PM	G MXTV	6.30PM	PG RANDOM ACTS OF KINDNESS
7.27PM	G EMTV TOK SAVE	5.30PM	G MILLIONAIRE HOT SEAT	3.00PM	G	7.30PM	PG 60 MINUTES ..Best of....
8.00PM	PG ELITE MUSIC ZONE	6.30PM	G A CURRENT AFFAIR	6.00PM	G NATIONAL EMTV NEWS	8.30PM	PG SUNDAY NIGHT MOVIE: PRIME - (2005 When Rafi a 37 year old single woman meets David, a 23 year old painter, it's love at first sight. But that love gets complicated when Rafi discovers that
8.30PM	PG RESCUE SPECIAL OPS	7.00PM	TOP SOIL (Final)	6.30PM	G		
				6.45M	PG AUSTRALIA'S FUNNIEST		

TORO



BIABIA



KANAGE



TOKWIN

Hap na kwata buai em K1 long Mosbi

Prais bilong buai long Mosbi siti i givim bikpela het na skin pen tru long ol lain bilong kaikai buai. Sampela ol lain bilong salim buai i wok long katim buai i go hap o kwata na salim long K1. Sampela lain i wanpela buai long K2. Yupla...ating mas nogat buai long Papua o?

Nogat sem bilong Lae setelmen lain

Gavman long Morobe mas tingting gut na rausim ol setelmen

lain bilong Hailans long Lae bikos pasin bilong ol long pait namel long ol yet i bagarapim tru nem bilong Morobe. Moa-beta ol mas karim dispela stail bilong ol i go bek long ples bilong ol na wokim long hap.

Kutupi long Henganofi soim kala

Wanpela viles long Henganofi em arapela viles save tok bilas long en i soim tru-pela kala bilong em long Nu Yia taim em i bungim K10,000, 5-pela kau na 2-pela lod gaden kaikai ol i putim long daina trak na 80-pela bilum na givim ol lain husat

i go long bikpela SDA sios kem long Kutupi.

Bikpela ren tasol Kavieng i drai

Ren i wok long pundaun long planti hap bilong kantri na baret wara i tait na bagarapim ples, tasol Kavieng long Nu Ailan i drai tru. Ol manmeri i kisim taim nogut stret. Wanpela man Mussau long Mosbi i tok pilai olsem em i laik bungim ol tenk na pulapim ol wara long Mosbi na go kapsaitim long Kavieng.

Tokwin Tasol...

Word search grid with letters arranged in a 10x10 pattern.

PAINIM OL DISPELA TOKTOK BILONG HAUS SIK:

Table listing words and their corresponding letters: DOKTA NES SIK BET MALARIA KUS, MARASIN NIDEL TIETA SUT BLUT, OPERESEN DRIP HELTBUK WOD MAMA KARIM, AUTPESEN SKEL GLAS EKREI BANIS

Two 6x6 grids for a word search puzzle with numbers in the cells.

A 10x10 grid for a word search puzzle with numbers in the cells.

Ansa bilong las wik Sudoku

A crossword puzzle grid with some letters filled in.

Ansa bilong las wik Pasol

EMTV Television Guide

Large television schedule table with columns for time, channel, and program name. Includes programs like NATIONAL EMTV NEWS, JOYCE MEYER, and AUSTRALIA v ENGLAND.

Ol Progam na Taim i ken senis...



Barakau Ples amamasim Krismas na Nu Yia wantaim kala

Nicky Bernard i raitim

KRISMAS na Nu Yia em yumi save amamasim wantaim ol famli memba bilong yumi yet. Sampela taim yumi save go na amamas wantaim ol poroman long tingim wankain gutpela na nogut samting yu mekim long olpela yia.

Barakau ples, em wanpela liklik Motu ples ausait tasol long Mosbi siti. Krismas na Nu Yia selebresen bilong ol, em ol i no save holim bilong wanwan femli o wan-

wan klen, tasol nogat. Ol save bungim olgeta ples lain na mekim 4 pela grup, na ol save amamas wantaim.

Dispela Krismas na Nu Yia, i bin senis liklik. Ol yut na Sande skul lain i go pas long amamas bilong ol long wanem, kalenda lotu bilong ol Yunaited Sios em i pundaun stret long Krismas na Nu Yia long ol mas mekim sampela pilai long amamasim ol.

Long dispela wanpela wik ol yut, Sande skul na papamama olgeta i bin kam aut

long mekim dispela ol kainkain plai. Ol statim selebresen long pilai graun bilong ol na bihain ol go long solwara. Na bihain ol pinis kam bek long graun.

Long namba wan de bilong Krismas, ol bin wokim bikpela lotu, na bihain long lotu ol pilai olsem soka, volibal, kanu resis na suvim resis i bin kamap.

Long nait tu ol bin gat ol pilai bilong ol. I gat kwaia na string ben resis. Na lasim long en, olbin kamapim fasen so. Long dispela wanpela wik, Barakau ples i stap

long amamas inap kam long las wik Sande taim ol selebresen i kam long pinis bilong em.

Dispela foa (4)pela grup ol kamapim em, SHALOM (Gods Peace) i putim kala bilong Red, JIB (Jesus I Believe)em kala Blue, LOGOS (Lord Our God Our Saveiour)kala green na AGAPE (Gods Love) i putim kala yellow. Ol dispela 4 pela grup i bin mekim Krismas na Nu Yia bilong Barakau ples i kala na nais tru na i nogat hevi i kamap long ples.



Loya Naru kapsaitim yet helpim long ol Kristen sios

....em opim akaun bilong ELC-PNG Nesenel Pasto Konfrens



Mista Naru (namba tu long lephan wantaim glas) i givim K10,000 sek long ol komiti memba bilong 2011 ELC-PNG Nesenel Pasto Konfrens. Long lephan em Bamake Rumbam, Peter Aglua, Pasto Gundu Kagl Guenu, Kotoemo Tauya na long raithan em het-meri Enga Gundu. Kar long baksait em Mista Naru i givim long Het Bisop bilong ELC-PNG long yusim long taim bilong konfrens.

James Kila i raitim

BIKPELA het-tok Evanjelikal Luteran Sios bilong Papua Niugini (ELC-PNG) i putim kamap insait long Sios Sinod long Lae, Morobe provins las yia em "Wokabaut Wantaim Ol Bilip Manmeri Insait long Pasin bilong LAIKIM".

Het Bisop bilong ELC-PNG, Giegre Wenge i bin surikim tok long lotu insait long sinod olsem ol Kristen bilipman meri i mas holim pas dispela het-tok na bihainim long strongim bilip bilong ol long pasin bilong laikim wanpela arapela na strongim wok bilong sios.

Wanpela strongpela Luteran bilipman na loya Kelly Naru i wok long go het yet long soim han mak bilong em long pasin bilong laikim na givim. Em i helpim planti Kristen Sios insait long Hailans, Morobe na sampela hap long Sauten rijon. Dispela Songan Mista Naru i save putim tru mining bilong dispela het-tok ELC-PNG i putim i kamap tru tru na kapsaitim helpim o blesing Papa God yet i givim long em.

Long Trinde, Disemba29, dispela praivet loya i bin bung wantaim ol komiti bilong ELC-PNG 2011 Nesenel Pasto Konfrens long Marimari Luteran Sios long Godens long Mosbi na em i givim K10,000 long helpim komiti long opim nupela akaun we ol narapela Kristen manmeri i ken givim helpim i go long en.

Songan Naru i tok olsem em i givim dispela mani long helpim komiti long opim akaunt na kirapim tingting bilong arapela ELC-PNG Kristen manmeri, husat i wok long bikpela wok, saveman, bisnisman olsem insait long bilip bilong ol, ol i ken helpim long sait bilong

mani o givim samting long helpim dispela Nesenel Pasto Conference.

Narapela helpim Mista Naru i tokaut tu olsem em bai givim wanpela kar bilong em long Het Bisop bilong ELC-PNG long yusim long taim bilong konfrens long Mosbi. Em i bringim dispela kar i go soim ol komiti taim ol i bung long Marimari Luteran Sios long Godens.

Long dispela yia Papua Distrik Kaunsil bilong ELC-PNG i kisim dispela wok long lukautim Nesenel Pasto Konferens we bai kamap long mun Septemba stat long Sande, Septemba 25 na pinis long Fraide Septemba 30.

As-tingting bilong dispela konfrens em long bungim olgeta lain nesenel pasto husat i mekim wok bilong autim tok bilong God long kam bung na givim ripot long wok bilong ol, toktok long wanem ol hevi ol i wok long bungim na tu long painim wanem gutpela rot i stap long bringim kamap gutpela sevis long helpim kongrigesen bilong ol. Planti ol pasto i save stap long ol busples tru insait long PNG na i save hatwok tru long mekim wok long ol eria we nogat gutpela gavman sevises i go.

Kodineta bilong 2011 ELC-PNG Nesenel Pasto Konfrens, Karl Gundu i tok olsem komiti bilong dispela konfrens long Papua Distrik i laik mekim dispela kibung long Mosbi narakain liklik na spesel.

Pasto Gundu i askim na kisim gutpela bekim i kam long ol arapela kongrigesen na ol pipel bilong kain kain wok na save insait long Mosbi long stap olsem komiti memba. Ol dispela 31 man meri i amamas tru long helpim na kamapim

dispela bikpela konfrens bilong ol pasto long Mosbi long mun Septemba, 2011.

Pasto Gundu i tok Komiti i laik bringim ol pasto long dispela konferens wantaim ol meri bilong ol tu wantaim. Dispela em bikos planti taim ol meri bilong ol pasto i save hatwok na sakrifais na wok raun wantaim ol man bilong ol long bus na longwe ples tru long PNG.

Olsem na dispela 2011 ELC-PNG Nesenel Pasto Konfrens Komiti i redim wanpela pepa o proposal wantaim ol infomesen na leta bilong askim long helpim i go long Kristen bilipman meri bilong Sios, ol bisnis haus, sios kongrigesen memba na nesenel na provinsal gavman.

Dispela helpim ol i kisim we mani mak i sanap olsem K7 milien bai ol i yusim long sait bilong trenspot, ples bilong slip na kaikai bilong moa long 3,400 pasto na ol meri bilong ol husat bai kam long olgeta hap bilong Papua Niugini.

"Planti ol pasto na meri bilong ol i wok long bus ples na longwe tru long taun na siti," Pasto Gundu i tok.

"Sampela bilong ol i no bin flai long balus bipo na tu i no bin gat sans long go lukim ples olsem Mosbi siti olsem na mipela i laik mekim dispela konfrens long Mosbi i spesel long laip bilong ol wan wan," Pasto Gundu i tok.

ELC-PNG Nesenel Pasto Konfrens i save kamap insait long olgeta tupela yia. Dispela kibung long mun Septemba long dispela yia we Papua Distrik bai lukautim em bai kamap gen long ples bilong ol bihain long 40 krismas. Olsem



Ol viles lida man bilong Niuiruka viles long Rigo i amamas tru long kisim K5,000 long saptim tripela sios long eria bilong ol na viles elementary skul. Potos: James Kila

na ol komiti long Papua distrik i laik mekim dispela konfrens spesel na i laik bungim ol meri bilong ol pasto tu long stap.

Stori bilong helpim Mista Naru i givim long taim bilong Krismas i stap yet.

Long Krismas De, Sande Disemba 25, Mista Naru i bin go harim lotu long Good Sheperd Luteran Sios long Koki long Mosbi. Dispela lotu em spesel taim we planti Kristen manmeri i putim yau na harim tok bilong Papa God long wanem tru mining bilong Krismas na wanem gutpela samting wan wan Kristen manmeri i ken mekim long lukautim bilip bilong ol na tu strongim wok bilong Sios.

Bihain long dispela lotu, Mista Naru, putim stret mining bilong pasin bilong laikim na givim na i opim ai bilong olgeta lain husat i go lotu long hap. Mista Naru i givim K10,000 long Good Sheperd Luteran Sios kongrigesen long helpim long long stretim haus lotu bilong ol. Dispela haus lotu em wanpela olupela tru insait long Mosbi na wok plen i stap nau long senisim na mekim em kamap bikpela.

Long Mande, em Boksing De, Disemba 26, Mista Naru i kisim kar na bihainim Magi Haiwe i go abrusim Kwikila stesin na go long Niuiruka viles we i stap arere tasol long wanpela bikpela wara na i bung wantaim ol lida man

bilong dispela ples.

Wokabaut bilong Mista Naru i go long dispela ples em long bungim ol femili bilong wanpela man bilong Niuiruka viles, husat i maritim wanpela pikinini meri bilong Mista Naru bilong ples Yalu long Morobe provins. Tasol insait long dispela wokabaut bilong Mista Naru, em i soim gutpela pasin bilong em taim em i givim K5,000 long helpim wok bilong sios na skul long dispela viles komyuniti.

Insait long dispela mani-mak em i givim, K1,500 bai go long helpim wok bilong Yunaited Sios, K1,500 i go long helpim Nu Apostolik sios na K1,500 i go long Salvesin Ami. K500 insait long dispela mani i go long helpim Niuiruka elementari skul.

Olgeta ol hetman na lida bilong Niuiruka viles i paol long mekim toktok. Dispela helpim Mista Naru i givim em nupela kain samting tru long ol bikos nogat autsait lain o politisen o bisnisman i bin go long ples bilong ol bipo na givim kain helpim olsem.

Sampela i tok Mista Naru em trupela man tru Papa God i bringim i go long helpim Niuiruka komyuniti we gavman na ol provinsal lida i nogat luk-save long en.

Ol i tok tu olsem Mista Naru kamap olsem spesel Krismas presen bilong Niu Iruka viles long Rigo, Sentral provins.

DRING NA DRAIV Em i no wanpela PILAI



NOKEN DRING NA DRAIV

Dring na draiv save kamapim planti birua long rot na kamapim dai insait long PNG. Sapos yu ting yu orait long draiv bihain long yu dring sampela botol dia, yu mas tingting gut pastaim. Yu ken sevim laip bilong yu ken na ol narapela tu. Em taim nau long tingting gut long ROT SEFTI - em i no wanpela PILAI



SAPOS POLIS HOLIM YU BAI YU GO KALABUS

Lusim laisens blong yu,
na bai yu kisim sas

ROT SEFTI em ino wanpela PILAI

A road safety initiative by



Raun wantaim Kanage olgeta wik

Buddy Kanage em bos stret bilong skul Gate!

Buddy Kanage em wanpela strit mangi long Apo kantri. Edukesen i abrusim em pinis. Em man bilong raun long strit na salim buai na simuk. Liklik wansling e mi kisim e mi save tromoi long 6 peks long

Bintangor Trading long Goroka. Long wanem em wanpela ful sapota bilong ol mangi Apo stret - Goroka! Em i nogat femili. Ol wokman i save wetim potnait, tasol buddy kanage em nogat. Em i save on long seven deis a wik. Yu ting wanem? Kanage, em fit mangi stret, the buai seller. Na wanpela taim e mi dring na spak nogut tru na e mi kam sanap poromanim skul gate, em buai maket long Goroka. Ol mate bilong em, ol i strit mangi i lukim em na wokim pani long em. Tasol kanage em bikpela mangi na olgeta manmeri i save long em. Na em ino wari, em tu i wokim ekstra pani antap gen. Ayo! Maski, bikpela pani na nois tru i kamap. Olgeta manmeri i save em buddy kanage tasol! Na i wok long preach long ol manmeri. Kain olsem wanpela edukesenis bilong strit. Tasol, maski wanpela poro blong em i salensim em liklik na em i no wanbel. Em bikpela mangi ya! Na e mi tromoi hap inglis long mate bilong em olsem. "Yu wana salens mei. No! no! no! i do not like dizz. Respect 35 and make 34" Man ol manmeri kirap nogut tru olsem buddy kanage i save long inglis tu ya! No ken traime buddy kanage, inglis kilimem na stap.

Mums Kanage, em gel stret

Mums Kanage em on pinis wantaim Live Lavex na gel e mi kam sanap wantaim SP wan botol na salim arrow blong dat, em 10t tasol long wanpela spia long Suave maket. Na em i singaut istap long ol man i kam baim spia na sutim dat long winim wanpela Maggie kiub. Tasol, nogat man i kam. Ol i save olsem mums em mas on pinis ya. Olsem na wanpela liklik mangi bilong hauslain i kam long trikim em. Em i kam na kisim tenpela arrow long han bilong mums Kanage. Na em i sut igo na ero



em i pinis na em i laik go. Na mums Kanage i askim em long man bilong baim ol spia. "eei boi, mani i kam, yu no baim ero yet" mangi ya, e mi ting olsem Mums Kanage em i aut pinis na em ino nap save. Na em i laik trikim mums, tasol mums i save yet. Na boi ya tokim Mums olsem, "Mums, mi traime han tasol ya". Na mums i inglis long em. "Eei boi, wai and you trick me?" Mums Kanage em gel stret, noken traime em. Bai yu kisim Inglis.

Paps Kanage - tokaut na tok stret!

Paps Kanage igo long wanpela konferens bilong ol bikman long ovasis, long toktok bilong HIV & AIDS program. Taim e mi stap long konferens, e mi bin raun long sait, long visit long ol hotel long dens long nait. Konferens i pinis na kanage i kam bek long PNG, na em igo long haus. Na em i givim ol deti klos blong em long mama long wasim. Orait, mama i sekim ol poket bipo long putim ol klos igo long wasing masin. Man, mama i kirap nogut tru long painim ol peket bilong kondom long ol trausis poket. Orait em i putim ol peket i stap long rum long soim kanage taim em i kam bek long wok long haus. Long apinun, Kanage i pinis long wok na kam long haus. Orait, ol pikinini i pilai stap autsait long haus. Na mama singautim paps Kanage igo long rum na soim em ol peket blong kondom. Mama i tok; em wanem samting ya?" Taim Kanage i lukim ol peket, em i kirap nogut tru na em i tokim mama isi tasol; "eee, mother noken tokim ol mangi, long bung ol i bin givim mipela olgeta. Na ai blong ol planti man na mi sem long tok nogat. Olsem na mi kisim tasol na pulimapi long poket. But, that is for your safety and my safety only". Em wei bilong paps Kanage long saitim tok.

By Phanda, Apo Kantri.



NEM: Philipi Jonathan Hiwaye
KRISMAS: 19 (man)
DRES: C/O New Tribes Mission, P.O.Box 1079, Goroka EHP
SAVE LAIKIM: Pilai soka, mekim pani, raun long bus, fising, raitim pas na lukim niupela ples

NEM: Yasling Noeno
KRISMAS: 18 (man)
ADRES: Kotidanga Primary School, P.O. Box 117, Kerema, Gulf Provins
SAVE LAIKIM: Pilai volibol, stori, painim abus long bus, harim musik, go Lotu na ridim ol buk.

NEM: Boldon Suko
KRISMAS: 23 (man)
ADRES: Kilipau Village, P.O.Box 96 Vanimo Sandaun Provins
SAVE LAIKIM: Pilai soka, raitim pas na senisim Pre-sen.

NEM: Benard Wai
KRISMAS: 22 (man)
ADRES: Kilipau Village, P.O.Box 96 Vanimo Sandaun Provins
SAVE LAIKIM: Pilai soka, senisim presen, raitim pas na mekim pren (Painim Meri long maritime)

NEM: Ben Iwi
KRISMAS: 27 (man)
ADRES: Kilipau Village, P.O.Box 96 Vanimo Sandaun Provins
SAVE LAIKIM: Pilai soka, volibol, raitim pas na senisim presen.

NEM: Belden Wangu
KRISMAS: 20 (man)
ADRES: Kilipau Village, P.O.Box 96 Vanimo Sandaun Provins
SAVE LAIKIM: Senisim presen, raitim pas, harim musik, mekim Pren na painim meri wanpela long maritim.

NEM: Augustine Pinu
KRISMAS: 18 (man)
ADRES: Kilipau Village, P.O.Box 96 Vanimo Sandau Provins
SAVE LAIKIM: Raitim Pas, harim musik, senisim prensen na pilai soka

NEM: Sheena Dogbatse
KRISMAS: 26 (meri)
ADRES: U.C.C. Cape Yars, P.O. Box UC- 340 U.C.C central/ Reg, Ghana West Africa. Phn: 00233 - 2750 - 82973
SAVE LAIKIM: Mekim Pren, senisim presen, go Lotu, raun na painim haus man long maritim na stap gut oltaim.

NEM: Paul Telape
KRISMAS: 20 (man)
ADRES: The University of Papua New Guinea, Mt Hagen open Campus, P.O. Box 90, Mt Hagen Western Highlands Provins
SAVE LAIKIM: Pilai rakbi, basket bol, volibol, stori long tumbuna na pani storis, pilai gita na arapela musik, go Lotu na mekim Joke.

PMIZ inap kisim 30,000 manmeri long wok



PMIZ i GUT NIUS: Kapris askim ol manmeri long givim luksave.

PASIFIK Marin Industriyel Zon (PMIZ) inap long kisim 30,000 asples manmeri long wok.

Sampela inap wok stret long dispela bisnis senta na sampela bai kisim wok o mekim mani long liklik bisnis ol i mekim wantaim ol kampani long dispela senta.

Dispela em tok bilong Minista bilong Komes na Industri na Memba bilong Maprik, Gabriel Kapris, long taim ol asples manmeri i tok long pasim dispela senta.

Ol asples manmeri i tok gavman i no bin toktok gut wantaim ol long kamap bilong dispela senta na olsem em i mas pasim na stretim tok wantaim ol pastaim.

Ol pipel long Bel, Madang Lagun

em ol asples manmeri i tok planti samting gavman i no stretim tok wantaim ol bipo long em i tok long kamap bilong dispela senta.

Tasol Minista i tok ol pipel i no keningting planti bikos planti ol gutpela samting bai kamap long ol bihainim kamap bilong senta.

Em i tok long senta i kamapim inap olsem 30,000 wok i bikpela samting.

Em i tok moa olsem kamap bilong dispela senta tu i gutpela bikos em bai stap long planti yia i kam.

"Ol minerel bilong mipela i gat taim bilong ol long pinis tasol dispela senta bai stap long planti yia i kam.

"Olsem mipela i lukim long Misima Main we gol i pinis

bihain long 20 yia.

"Kamap na stap bilong dispela senta i min mipela bai salim pis i go aut long planti kantri.

"Bai gat dairekt flait i go long Siapan na atoriti bai mekim bikpela ples balus long Madang long mekim ol bikpela balus i go kam long em," Mista Kapris i tok.

Na em tok amamas tu long Nesenel Eksekutiv Kaunsil (NEC) long givim i tok orait long kamap bilong senta.

Dispela disisen i kamap long Septemba 30, 2009 we gavman i tok orait long K441 milion long kamap bilong dispela bisnis senta.

Dispela mani em gavman bilong Saina i helpim na givim.

Manmeri mas baim PNG Made samting tasol

MANUFEKTARAS Kaunsil bilong Papua Niugini i amamas long ol samting em i kamapim, long makim maus bilong ol memba na long lukim olsem bisnis komyuniti i gat mausman husat i ken tokaut long hevi na laik bilong ol long wok bisnis long Papua Niugini.

Kaunsil i kamapim bikpela mak insait long wok bilong gavman na pablik sekta. Na olsem em i mas holim na skruim dispela mak.

Polisi bilong Kaunsil em long wok wantaim ol opisa bilong Gavman husat i mekim polisi na ol arapela menufektara long lukim olsem menufektaring industri long Papua Niugini i gro strong. Wantaim hop bilong kamapim moa wok bilong ol manmeri.

Kaunsil i skruim yet wok bilong apim mak bilong ol samting ol i wokim long Papua Niugini. PNG-MADE logo em Kaunsil i lonsim long 1990's long promotim ol samting ol kampani i wokim long kantri long ol maket long PNG yet na long ovasis. Logo i kamap bilong pulim laik bilong ol manmeri olsem ol bai baim samting bilong ol yet- samting ol i wokim long Papua Niugini!Kaunsil i wok strong long lukim olsem ol memba bilong em i kisim stretpela sas o takis long ol samting ol wokim bihainim sas ol kisim long baim samting long narapela kantri na kamapim samting ol i laik kamapim wantaim as tingting bilong wokim samting i tru.

Dispela em kaunsil i lukim i no helpim ol menufektaring industriyel sekta tasol long wankain taim i helpim ol kas-

toma bilong PNG-MADE samting.

Wantaim dispela Kaunsil i save wok wantaim ol arapela grup long praivet sekta oganaisesen long stretim tok long ol prais insait long industri long guds na sevis ol i givim long ol kastoma.

Kaunsil i kamapim sekretariat long Mosbi na dispela sekretariat em Bod ov Dairektas i save ronim we ol i save bung long wan wan mun long toktok long ol samting bilong Kaunsil.

Kaunsil i kamap bilong helpim kamap bilong ol samting ol i wokim long Papua Niugini.

Manufektaras Kaunsil bilong Papua Niugini, i wanpela non-gavman oganaisesen we i kamap long 1991 na i kamap bilong promotim ol samting ol i wokim na kamapim long Papua Niugini yet.

Wan wan ol menufektara long Papua Niugini i pilim pen long lo long sampela kain we dispela lo i save mekim long bisnis bilong ol na kamap bilong mani insait long bisnis bilong ol.

Kaunsil i save givim planti ol sevis na helpim long ol menufektara long kantri. Kaunsil i makim maus bilong ol memba bilong em na i tokaut long samting ol i laikim long em long sait bilong kisim toksave, skul o helpim insait long komes na industri sekta na ol Dipatmen long wan wan level olsem Nesenel, Provinsel na Lokel level Gavman.

Kaunsil i sapotim ol memba bilong em long bikpela mak long sait bilong sevis na i lukim wok bilong em long:

Promotim Helpim Givim toksave

Long ol memba husat i gat hevi sapos dispela ol hevi i pas long wok bilong lo o long ol arapela samting, long ol i go long Kaunsil long tokaut long hevi bilong ol bai Kaunsil i ken helpim ol na toktok long Gavman.

Dispela kaunsil i mas kamap bikos sapos olgeta menufektara long kantri i luksave long bikpela mining bilong wok bung wantaim long tokaut long hevi bilong ol i go long Gavman, long ol ejen bilong sip na balus na ol arapela grup na oganaisesen wantaim tingting olsem "bung wantaim, tok bai strong."

Kaunsil i kamapim pinis planti ol bikpela samting we i helpim ol memba bilong em, maski ol i bikpela o liklik kampani.

Kaunsil i sapotim na i laik helpim wok bilong ol Papua Niugini menufektaring kampani long ol i ken go moa na luksave long olgeta strong na save ol i gat bilong mekim ol samting.

Papua Niugini Gavman i bin helpim long kamapim Menufektaras Kaunsil.

Na em bai laik long bung wantaim wanpela bodi husat i makim maus bilong olgeta moa long em bai laik bungim wantaim planti bilong ol long wanpela taim.

Wantaim strong em i kisim long olgeta dispela ol memba, Kaunsil nau i gat gutpela sapot long toktok wantaim Gavman long wok bilong em long psikol plening, kastoms duti, tarif na tekseen polisi.



GES PAIA: InterOil Elk-4 i paia lait.

Maski long kamap bilong LNG, pipel bai kisim taim yet: Saveman

Paul Zuvani i raitim

MASKI long kamap bilong bikpela Likwifaid Nuturel Ges (LNG) projek planti manmeri bai kisim taim yet.

Inap long taim gavman i skelim na yusim gut mani em i kisim long dispela projek na ol arapela ges, petroleum na maining projek sindaun bilong manmeri bai i no inap gutpela.

Dispela i tok bilong Dokta Laurence Chandy bilong Lowy Institut long Australia.

Em i mekim dispela tok long Nesenel Risest Institut (NRI) long Mosbi long dispela taim gavman i tok Papua Niugini bai kisim gutpela mani long PNG LNG Projek.

Em i tok em i tru olsem 60 pesen bilong mani ol kampani long narapela kantri i save go aut na 40 pesen i stap bek.

I olsem long 10-pela samting, 7-pela i go aut na tripela i stap insait.

So maski Gavman navelopa i tok dispela projek bai kamapim planti mani, planti bilong dispela ol mani i no inap helpim sindaun bilong ol manmeri.

"Na long 30 pesen sapos Gavman i skelim gut dispela mani bai lukim stap bilong ol manmeri i kamap gutpela."

"Sapos nogat dispela 30 pesen bai go long liklik lain tasol na planti manmeri bai kisim taim nogut yet."

"Manmeri husat i gat sans long holim dispela mani bai skruim yet wok bilong kamapim moa kago na mani bilong em na liklik manmeri bai stap olsem tarangu," Dokta Chandy i tok.

Tasol sampela ol man olsem bipo Seketari bilong Foren Afeas, Gabriel Dusava, na bipo Vais Sansela bilong Yunivesiti bilong Papua Niugini, Joseph Sukwianomb, i tok ol toktok bilong Dokta i no tru.

Ol i tok PNG i lukim sampela gutpela senis pinis na i no tru olsem kantri i stap daunbilo tru long wok bilong developmen long mak bilong Yunaited Nesenel.

"Toktok bilong mi i givim narapela hetpen long mi.

"Mi ting mi kamap orait tasol yu givim mi narapela pen gen," Mista Dusava i tok.

Na Mista Sukwianomb i tok Dokta Chandy i mekim wok painim long ol laibreri na kompyuta tasol.

Em i no bin go aut tru tru long ol lokol ples long painim aut sapot ol pipel i stap long mak nogut.

"Mi laik save Dokta Chandy i go long Maramundi, Angugnak o Lek Kopiago."

"Mi laik tok olsem mi bin go na mi lukim ol manmeri i stap klina na i gro gut."

"Long yu kam na tokim mi olsem stap bilong mi i nogut em dispela mi no klia," Sukwianomb i tok.

Tasol Dokta Chandy i tok em i tokaut long PNG i stap tarangu yet maski long gutpela ron bilong kantri long wok bilong mani long 7-pela yia sindaun bilong kantri i nogut yet.

Em i tok dispela i no long sait bilong mani tasol moa long sait bilong infrastraksa em long ol rot, bris, ples balus, ol haus sik na skul.

Dispela ol samting i brukdaun yet, Dokta Chandy i tok.

DAL odit seksen kisim mani long mekim wok

INTERNEL Odit Yunit bilong Dipatmen bilong Agrikalsa na Laipstok (DAL) i kisim inap sapot long karimaut wok bilong em.

Dispela Yunit, we i gat 4-pela wok manmeri, nau i ken mekim gut wok bilong ol bihain long ol i kisim mani long Dipatmen bilong Tresari na Fainens aninit long Pablik Sekta Odit Komiti Progrem Sapot Fan long baim ol komputa na ol arapela samting bilong opis.

Tresari na Fainens Dipatmen i no longtaim i go pinis i givim K26,293.91

sek mani long DAL Sekreteri Anton Benjamin.

Mista Benjamin i tok Intenel Odit bilong DAL i no bin inap long karim aut ol wok bilong em gut bikos em i no bin inap long gat mani long baim ol samting na mekim wok.

Tasol nau wantaim dispela mani em i hop Odit divisen bai wok gut.

Em i tok pastaim long dispela helpim i kam maski em i nogat inap ol samting bilong mekim wok divisen i wok hat olsem sampela ol hap bilong em i mas wok gut.

Ekting Sif Intenel Odit,

Paul Kumpio, i wanpela amamas man taim dispela helpim i kamap na em tok tenkyu long Tresari na Fainens Dipatmen.

Em i tok odit seksen i bikpela hap bilong dipatmen na olsem em i mas gat mani long karimaut gut wok bilong em

Tasol nau olsem em i gat mani opis nau bai inap long mekim ol wok we bipo em i no inap long mekim.

Steven Pupune, Siaman bilong DAL Odit Komiti i stap long lukim givim bilong dispela mani.



KISIM SAVE: DAL Sekreteri Anton Benjamin i kisim sek mani long Kasi Gege, Hetmeri long Intanel Odit na Komplains Divisen long Fainens Dipatmen long taim Steven Pupune i lukluk.

Pablik praivet patnasip rot bilong strongim kakau industri long Oro

KAKAU i wanpela bikpela kes krop long sapotim laip bilong planti manmeri long Papua Niugini.

Dispela i no nupela samting long taim ol manmeri long Oro i askim ol opisa bilong didiman long helpim ol wantaim kakau sid na poli beg long planim kakau.

Askim bilong ol manmeri bihainim plen DAL Sekreteri Anton Benjamin long taim em i go long lukim kamap bilong 2007 i go long 2016

Oro i wanpela bilong ol provins we i stap insait long kamapim Nesanel Agrikalsa Developmen Plen 2007-2016.

Plen bilong kamapim strong na developim kakau industri i luk gut aninit long pablik praivet patnasip tingting we praivet sekta i wok bung wantaim provinsel gavman, kakau fama na ol arapela ejensi.

Wanpela gutpela piksa bilong dispela kain tingting em wanpela lokol kampani, Oro Agrikalsa Ltd, we em i bung wantaim provinsel divisen long Agrikalsa na Laipstok, PNG Kakau na Kokonas Institut, papagraun, ol fama na ol arapela lain long yusim gut kamapim wok bilong kakau na strongim wok long distrik.

Kampani i kamapim olsem 180,000 kakau sidling neseri long Emboho viles olsem namba wan hap bilong givim sidling long ol fama we i stap long ol gutpela hap olsem Ijivitari distrik long kamapim kakau.

Gutpela kamap bilong dispela oporesen bai lukim wok i go long ol arapela distrik long provins. Oro inap kamap wanpela hap



WOK BUNG WANTAIM: Ol didiman opisa, ol opisa bilong Oro provinsel administresen, Oro Agrikalsa Ltd. Ambogo Somil ltd na ol fama i sekim kakau neseri bilong kakau long Emboho ples.

bilong kamapim kakau long kantri sapos dispela progrem i kamap gut.

Oro Agrikalsa Ltd i gat strateji o plen long kamapim wok kakau long provins.

Moa long 17,000 fama i soim laik long baim ol sidling na groim kakau.

Bikos long dispela laik Oro Agrikalsa Ltd i kamapim nesari wantaim bikpela sapot i kam long Oro Provinsel Edministreta, Owen Awaita, na administresen

bilong em.

Oro Agrikalsa Ltd fil menesa bilong oporesen, Bernard Gene, i man stap bihain long kamap bilong kakau nesari na ekstensen yunit.

Gene, husat i bipo didiman opisa, i tok kampani i hop long salim ol sidling long ol fama i gat laik long mekim dispela wok.

Na wantaim dispela em i tok ol fama bai kisim skul tu long ol opisa long wok bilong lukautim kakau.

Em i tok kakau inap long kamap gut long Ijivitari, kampani i plen pinis long surukim wok bilong em.

Trevor Yavabu, wanpela rural developmen opisa wantaim provinsel agrikalsa divisen i tok klostu wantaim Bernard long nesari projek.

Trevor i amamas long dispela kain plen na i tok kakau i ken kisim ples bilong ol arapela krop olsem wel pam.

Aipas meri greduet bihain long kisim rais trening

WANPELA ai pas meri i namel long 15 rais fama we i greduet long 37 Hailans Agrikalsa Kolis greduesen seremoni long las Disemba.

Dispela meri em Elizabeth Mapu bilong Kuta ples, Hagen distrik.

Taim ol i kolim nem, em i kisim taim long kamap long fran long kisim setifiket bilong em.

Em i wokabaut isi, holim stik na bihainim pikinini boi bilong em i go long fran long kisim pepa.

Maski em ai pas wanpela i ken save em i gat bikpela amamas bikos long lap long pes bilong em.

Mis Mapu i gat 7-pela pikinini.

Olgeta lain manmeri i amamas bai ol i lukim em i wokabaut i go antap long kisim pepa bilong em. Bipo long hevi bilong ai pas i kamap long em, Mapu i wanpela gutpela meri we em i save lukluk.

Ai pas i kamap bihain long em i kisim wanpela bikpela sik taim em i bikpela. Em i kisim skul inap long gred 10 na bihain kamap praimerik skul tisa inap long taim sik i kisim em na em i kamap ai pas.

Bihain long dispela em i go long Mt Sion Ai Pas Skul long Goroka na nau i wok wantaim Westen Hailans Provins Dibeel Asosiesen.

Zongbao, Pyapowa na HAC Ekting prinsipel Philip Senat i tok Mapu i kamap long mak we planti lain manmeri long kain hevi olsem em i gat long em i no inap long kamap.

Tingting na laik bilong em long kisim save na sapotim laip bilong em i gutpela piksa ol arapela manmeri i mas lukluk na kisim gutpela tingting long em. Long rais trening, Zongbao na Pyapowa i tok save we Mapu i kisim bai givim long ol pikinini man bilong em long skruim.


Ol fama i kisim tupela wik aplen rais prodaksen kos we wanpela Saina teknikal tim we i stap long Mt Hagen i ronim.



KALAP: Wanpela Bears pilaia i abrusim het bilong birua bilong em bilong Brown Eagles bihain long em i kisim bal na autim em long laspela gem bilong ol long 2010 long Disemba 19. *POTO: Andrew Molen.*



RESIS: Tupela pilaia i ronim bal long NSL gem bilong ol long Mosbi long Disemba 4, 2010. NSL bai kirap bek long Sarere wik i kam. *POTO: Andrew Molen.*



TRENING: Kikboksa, Alfred Samuel i wok long trening long Australia las yia bipo long bikpela intanesenel pait bilong em long K-1. *POTO: Tim Drury/Fite 108.*



TIM WANTOK WARRIOR: Profesenol boksa, Kartu Arang (raithan) i sanap wantaim menesa bilong em, Glick Lambea. Arang i pinis pait long Novemba 2010. *POTO: Kartu Arang.*

Sempion bilip long ol PNG paitman

Andrew Molen i raitim

I NAP olsem 10-pela yia i go pinis taim Stanley "The Headhunter" Nandex i bin pait makim Papua Niugini olsem wanpela profesenol kikboksa, dispela spot i bin kisim biknem tru.

Planti yangpela man i laik kamap olsem Nandex na ol merit u i laik lainim dispela spot long save long lukautim ol yet na tu long stap fit na strong.

Nandex i no pait moa tasol em i wok yet long kamapim ol trening na tonamen bilong ol kikboksa bilong PNG, tasol nau yet i nogat narapela klap o man i stap long kamapim na ronim sampela kikboksing skul tu olsem Nandex.

Planti save laik mekim tasol nogat wanpela i kamap na i stap.

Tasol nau, i gat wanpela man husat i laik mekim dispela long PNG, dispela i no wanpela PNG man na tu em i no wanpela man nating.

Dispela man em Tim Drury na em tu i wanpela wol kikboksing sempion olsem Nandex.

Em i gat sampela ol taitol tu bilong boksing na i gat bikpela save long ol arapela stail bilong pait tu.

Drury em bilong Nu Saut Wels (NSW) long Australia na em i gat save long kikboksing, Muay Thai na Miks Masol Ats (MMA).

Muay Thai o Thai boksing na MMA em ol nupela kain spot we i wok long kamap bikpela na i gat bilip ol bai kisim ples bilong kikboksing bihain taim.

Nogut planti manmeri long PNG gat save long dispela ol nupela spot na stail bilong pait.

Wanpela Thai paitman bilong PNG tasol long nau em Lee "The Flash" Garap na MMA em Adrian Peng.

Drury i tok em i laik kisim dispela spot i kam long PNG na long wankain taim i helpim long developim ol kikboksa na arapela paitman husat i stap trening pinis.

"Mi laik helpim long developim ol PNG paitman long Australia na tu long ol provins long PNG bai planti moa yangpela manmeri ken i gat sans long kisim luksave long ol arapela hap long wol," Drury i tok.


Em i gat gutpela wokbung

wantaim sampela ol PNG kikboksa olsem Alfred Samuel husat ol i save go stap na trening wantaim em long Australia.

"Alfred em i gutpela paitman na tu em i gutpela poroman bilong mi na mipela i save amamas long em i kam stap wantaim mipela na trening na pait.

"Mi no inap kisim wanpela man i go long haus bilong mi long stap wantaim mi, meri bilong mi na pikinini bilong mi sapos mi no bilip long ol na i pretim ol liklik, Alfred em i gutpela man na mi save amamas long em," Drury i tok.

Em i laik bai planti moa kikboksa bilong PNG i ken bihainim Samuel long go trening



POROMAN: Drury (lephan) i sanap wantaim Samuel taim em i go stap na trening wantaim em long klap bilong em. POTO: FITE108.



TRENING: Sampela ol sumatin bilong Drury i trening long klap bilong em. POTO: FITE108.



STRETIM SKIN: Drury (namel) i kisim ol sumatin bilong em long trening long klap bilong em long NSW. POTO: FITE108.

long klap bilong em na pait long Australia.

Laik bilong Drury long wokbung wantaim ol PNG paitman na ofisol long developim dispela

spot i stat long Epril, 2009 taim em i kisim 8-pela paitman bilong em i kam pait long Mosbi.

Em i bin pait long wol taitol wantaim Andy Sam bilong

PNG tasol em i bin lus taim refri stopim pait long blut i kam aut long maus na nus bilong em.

"Mi bin harim na save long

PNG taim Stanley Nandex na mi kisim wanpela tim i kam.

"Mi bin harim sampela ol stori bilong PNG tu long bubu meri bilong mi husat i bin wok olsem wanpela misineri long hap 50 yia i go pinis," Drury i tok.

Long dispela taim inap nau, Drury luksave long ol paitman na ofisol bilong PNG na i gat tingting tu long opim wanpela klap long PNG.

"Mi bai amamas long opim wanpela han bilong klap bilong mi long PNG, sapos mi gat inap mani.

"Dispela kain profesenol klap bai helpim long bungim olgeta manmeri wantaim na tu lukautim ol yangpela long stap gut na tingting long trening na pilai na lusim ol arapela bikheth pasin," em i tok.

Fite108 em klap bilong Drury long Australia we em i save trenim planti ol yangpela manmeri long hap.

Em i trening em i no bilong paitman tasol, olgeta i ken kam kisim trening tu long stap gut na helti na tu ol i ken lainim sampela samting long lukautim ol yet sapos birua i bungim ol long wanpela taim.

Samuel i tok, Drury em i wanpela man we i no save rausim ol manmeri ol kros nating na i save wokbung gut wantaim ol arapela.

"Sapos em i kam opim wanpela klap long hia bai em i ken helpim planti manmeri tu long kamap gutpela spotsmanmeri long spot bilong ol na tu long kamap ol gutpela memba bilong komyuniti," Samuel i tok.

Drury i pinis pait las yia tasol nau em bai wokhat moa long promotim na trenim long yangpela husat i laik bihainim lek mak bilong em.

Em i lukim pait bilong ol PNG kikboksa na i bilip ol i ken kamap gut sapos ol i gat gutpela trening na developmen long wanwan eria bilong ol.

Tasol Drury i tok sapos em i opim klap long PNG, em bai no inap mekim nating.

"Mi bilip long pasin bilong wokbung, mi bai wokbung wantaim ol arapela asosiesen i stap pinis na tu ol boksa na paitman bilong PNG husat i gat laik long wokbung wantaim mi tu," em i tok.



RON GUT: Komonwelt Gems i redim gut Burua na ol arapela PNG rana bilong 2011 sisen. POTO: Tim PNG 2010/PNGSFOC.

Burua redi long nupela yia

BETTY Burua i redi stap insait long ol resis dispela yia bihain long sampela gutpela trening wok long Disemba bihain long em i kam bek long Komonwelt Gems long India.

Burua i bin go bek long Brisbane 6-pela wik olgeta bihain long em i kam wek long Komonwelt Gems.

Bihain long dispela em i go malolo long Papua Niugini.

Tasol bipo em i go bek long PNG long malolo, Burua na Salome Dell i bin stap insait long wanpela 600m resis long Melbourne we top 800m rana bilong Australia, Tamsyn Lewis i bin stap insait long em na tu.

Dell i bin brukim nesenel rekot bilong em yet long dispela resis wantaim 1 minit na 34.44 sekens na Burua i pinis baksait long em wantaim 1 minit na 32.45 sekens.

Long Disemba 29, 2010, Burua i go bek long Brisbane we em i stap wanpela wik na trening wantaim kosa, Lloyd Way bipo em i go long Amerika long Etlek skolasip skul bilong em long Yuni-versiti bilong Arkansas, Pine Bluff.

Presiden bilong PNG Athletics Union (PNGAU), Tony Green, i tok Burua bai go insait long indo (insait long haus resis) kompetisen long dispela mun na bihain i go resis autsait long mas na Epril.

Em i tok tu olsem pilai bilong ol insait long Komonwelt Gems i redim ol gut tu long resis dispela yia.



HEVI PINIS: Hevi bilong Inglis long painim klap i pinis nau na em bai stap wantaim Souths tripela yia.

Inglis stap wantaim Souths

GREG Inglis bai stap wantaim South Sydney Rabbitohs long narapela tripela yia bihain long NRL i tok orait long kontrak bilong em wantaim klap.

Sampela pepa wok na wanbel toktok i kamap namel long NRL, Souths na olpela klap bilong Inglis, Melbourne Storm, long lukim em i ken pilai wantaim Souths.

Hevi bilong Inglis i kamap bihain long em i lusim ol Storm long go long Brisbane wantaim meri bilong em husat i kisim wok long hap.

Inglis i bin gat tingting long go pilai wantaim ol Broncos tasol dispela i no kamap bihain long mani mak ol Broncos i makim i no inap long baim em long pilai wantaim ol na tu, sapos ol i apim dispela mak em bai

brukim lo bilong NRL.

Ol North Queensland Cowboys tu i bin tingting long kisim Inglis tasol ol i no bin mekim wanpela samting.

Em i go long Souths tasol wankain hevi em i bungim wantaim ol Broncos i kamap long South Sydney tu.

Tasol ol i mekim sampela wok we i lukim South's senta, Beau Champion husat i wanpela kasim brat tu bilong Inglis, i go kisim ples bilong Inglis long Melbourne bihain long em i amamas long kontrak ol i givim em.

Dispela i lukim Inglis nau bai stap wantaim Souths.

Siaman bilong NRL, David Gallop i tok dispela hevi nap pinis long taim sapos ol Souths i bin stretim ol dispela pepa wok long

namba wan taim yet.

"Mipela i amamas long Greg i go pilai long Souths o long wanem klap em i laik go long en," Gallop i tok.

Dispela ol hevi mekim na ol toktok i kamap tu olsem nogut Inglis bai lusim ragbi lig na i go pilai AFL wantaim Essendon Bombers.

Bombers i bin tokaut long Disemba olsem dispela ol toktok i no tru na ol i no bin bung wantaim Inglis long toktok long em long dispela.

Souths nau bai gat moa strong long beklain bilong ol wantaim helpim bilong Inglis husat i ken bung gut wantaim ol arapela olsem Nathan Merrit, Chris Sandow na Isaac Luke long givim het pen long ol arapela tim.

Collingwood tingting long pinis

WANPELA gutpela batsmen bilong Inglen (England), Paul Collingwood i bilip dispela laspela tes bilong ol agensim Australia em bai laspela gem bilong em.

Collingwood, husat i stap long taim long tim olsem wanpela gutpela pilaia bilong paitim bal na tu was long fil, i wok long lusim gem bilong em.

Em i save was gut long fil yet tasol ol mak bilong em long kisim skoa long paitim bal i wok long go daun long las 12-pela mun na em yet i save.

"Dispela em bai bikpela wik bilong mi long Sidni, bai mi lukim wanem samting i kamap long dispela tes bipo mi tokaut long wanem mi laik mekim," Collingwood i tok long ol nius ripot long Mande dispela wik.

Bipo Inglen kepten, Andrew Flintoff i singaut long ol i mas senisim Collingwood wantaim narapela batsmen, Eoin Morgan long dispela gem long Sidni.

"Mi save long wari na toktok bilong ol na mi no inap kirap nogut sapos ol i senisim mi o rausim mi long tim bihain long tes," Collingwood i tok.

Em i tok em i save olsem i gat planti ol arapela batsmen i stap husat i wok long pait long kisim ples bilong em.

Inglen i winim pinis dispela "Ashes" tonamen na nau ol i laik pasim dua olgeta na winim laspela tes tu.



TINGTING: Collingwood i bilip dispela tes i nap long kamap laspela intanesenel gem bilong em.

Samoa bai bungim Australia pas long 2011

NAMBA wan gem bilong Australia long asples bilong ol yet dispela yia bai kamap long Julai 17 agensim Samoa.

Dispela bai namba wan taim bilong ol tu long pilai long san o avinun long asples bilong ol yet, bihain long 6-pela yia.

Gem bai kamap long Olimpik stadium long Sydney we bai statim tu rot bilong Australia long redi long wol kap we bai kamap long Nu Silan long Septemba na Oktoba.

Bosman bilong Australian Rugby Union (ARU), John O'Neill i tok astingting bilong ol long kamapim dispela gem long avinun em long bungim ol manmeri na ol femili

wantaim long amamasim dispela pilai we i makim tu stat bilong ol intanesenel pilai bilong Australia dispela yia.

Samoa i stap long las 5-pela wol kap tonamen tasol i no bin stap long namba wan tonamen stret long 1987 we Tonga na Fiji bin makim Pasifik long en.

Ol i bin go long kwata fainols long 1991 na 1995 tasol i bin lus long Scotland na Saut Afrika long dispela ol pilai.

Dispela yia bai ol i stap long Pul D wantaim Saut Afrika, Wales, Fiji na Namibia.

Samoa i pinisim wanpela raun long Siapan (Japan), UK na Ailan

(Ireland) we ol i winim wanpela gem na lusim tripela gem wantaim liklik skoa lain.

Planti pilaia bilong Samoa i stap insait long Supa Ragbi resis nau na sampela i bin pilai bipo long en tu.


Sampela i gat planti eksperiens long pilai insait long NPC resis long Nu Silan na ol bai givim gutpela salens tru long Australia.

Kosa bilong Australia, Robbie Deans i tok dispela bai gutpela gem bilong ol long statim rot bilong ol i go long wol kap.

"Ol Samoa tu bai redim ol yet tu long go long wol kap olsem na ol bai putim wanpela strongpela tim long bungim mipela," Deans i tok.



SINGAUT: Samoa bai putim strongpela salens agensim Australia.



KAM BEK: Berrigan bai kam long NRL na pilai wantaim Titans o Warriors.

Berrigan bai kam bek long NRL

BIPO Australia pilaia, Shaun Berrigan i kisim tok orait long klap bilong em long Inglen Supa Lig, Hull FC.

Berrigan i stap long namba tri yia bilong 4 yia kontrak bilong em tasol i kisim tok orait long lusim klap na go bek long Australia.

I gat bilip em bai pilai wantaim Gold Coast Titans o New Zealand Warriors.

"Mi i gat gutpela taim tru long Hull FC we mi amamas tru na i gat planti gutpela poro na ol samting we mi bai tingim olgeta taim," Berrigan i tok long ABC nius.

"Yia bilong mi no bin isi we mi bin kisim planti bagarap long bodi bilong mi long pilai na tu papa bilong mi bin dai, dispela i mekim na mi laik kam bek long ples na stap klostu long mama na femili bilong mi," em i tok.

Berrigan i pilaim 74 gem wantaim Hull FC long Supa Lig bihain long em i lusim Brisbane Broncos long Australia long 2008.

"Long makim maus bilong ol dairekta, wokmanmeri, kosa, ol pilaia na sapota, mi laik tok amamas long Shaun long gutpela wok em i helpim long kamapim long Hull FC na em i ken stap gut wantaim femili bilong em long nau na i go," sif eksekutiv opisa bilong Hull, James Rule i tok long websait bilong klap.



Buy a **bemobile Turbo** today for K5, K10, K20 or K40

Press *1290*1*Turbo amount# Press send
example: Press *1290*1*5# Press send

It's **5** Times more credits on

Talktime to any network
SMS to any network
Internet Downloads

Em pawa blo yu!

call 1551 for more information on Turbo **bemobile** mipela bilong yu

SPOT RAUN

WANTAIM

Scott Vavine, ML



Spots long taim bilong Krismas na Nu Yia

PLANTI ol komyuniti insait long kantri nau bai putim spots i go insait long ol amamas bung na pilai bilong ol nau long dispela taim bilong krismas na Nu Yia.

Spots em i wanpela bikpela samting we i save kamap long dispela taim na i save kamapim planti gutpela samting tu.

Long dispela as, planti komyuniti save yusim spots long bungim ol manmeri na amamas wantaim long Krismas na Nu Yia taim.

Wanpela bikpela astingting bilong spots long taim bilong Krismas na Nu Yia em long bungim ol manmeri bilong kain sindaun na laip, wantaim.

Spots i ken kamap wanpela bikpela samting long taim bilong dispela kain taim bilong amamas.

Wanem kain pilai na amamas bai kamap long dispela taim em i stap long tingting na han bilong husat ol lain i go pas long kamapim dispela bung.

Planti manmeri save laikim bikpela resis i kamap namel long ol tim long dispela taim tasol sampela i save laik pilai long amamas tasol.

Tasol wanem kain samting ol i ogenaisa i tingting long kamapim, i mas kamap gut.

Ol i mas kisim bikpela taim long redim ol samting gut bipo long ol pilai ken kamap.

Gutpela wok redi tru bilong kain bung i mas kamap 6-pela mun bipo long taim bilong pilai stret na ol lain i go pas long mekim dispela i noken les na lusim long namel.

Klostu long taim bilong pilai, ol i ken lukluk long ol arapela liklik samting we ol i no bin stretim bipo na redi tasol long ol pilai ken kamap.

Long dispela taim tu bai komyuniti ken save pinis long program bilong tonamen na wanem kain ol samting bai kamap bai ol tu i ken redi long en.

I mas i gat i nap ol samting bilong kamapim na ronim kain ol bung tu olsem, mani, ol samting bilong pilai, ol wokmanmeri bilong helpim (voluntia), sekyuriti, teknikal ofisol na ol arapela.

Sapos dispela ol samting i stap redi bai olgeta wok i kamap na i ron gut tasol sapos nogat bai em i no i nap kamap gut na olgeta bai no i nap amamasim gut.

Taim ol manmeri no amamasim ol yet gut long dispela bung bai ol i tanim na i go mekim ol arapela samting we i no gutpela.

I mas ol samting i kamap we bai mekim olgeta husat i kamap long stap insait lng dispela pilai ol long lukluk tasol tu, i ken amamas long stap long hap long dispela taim.

Toksave long ol manmeri long hap tu olsem i tambu long dring na spak o bikhet long dispela bung.

Dispela em wanpela bung we olgeta manmeri long komyuniti wok long tingting long go bung long en olsem na yu mas mekim i gutpela bilong olgeta long kam, nogat wanpela man o meri mas bagarapim o pretim ol long dispela taim.

Em i no olsem ol arapela bung we i save kamap namel long yia.

Dispela em i taim bilong ol manmeri long bung wantaim ol femili, klen na ol komyuniti bilong ol we ol i no lukim ol yet o bung wantaim longpela taim insait long yia.

Nau ol i laik kam bek long ples na bung wantaim gen long dispela taim na dispela em gutpela taim long mekim kain samting olsem.

Yu mas plenim na tingim gut long mekim ol samting bipo ol i kamap.

Sapos ol ogaenaisa i mekim gut na i amamasim gut ol memba bilong komyuniti bilong ol, em mi ting ol i mekim gutpela wok.

Long pinisim toktok bilong mi long hia, mi laik tok gutpela Krismas na bikpela Nu Yia long yupela ol manmeri husat i save ridim dispela nambawan niuspepa bilong yumi, na tui go long ol femili bilong yupela.

PESMAN:
Genia i gat
gutpela luksave
long ragbi
yunion.



Luksave bilong Genia bipo long wol kap

OL gutpela luksave we ragbi yunion pilaia bilong Australia, Will Genia i kisim long 2009 na 2010 bai strongim em bipo long wol kap i kamap long pinis bilong dispela yia.

Genia, husat mama i karim long Papua Niugini, i kamap wanpela biknem pilaia bilong Australia bihain long em i go insait long nesanel tim bilong ol tupela yia tasol.

Em i pinisim skul bilong em long Brisbane Boys College long 2005 na pilai bilong Kwinslen na Australia long ragbi yunion bilong ol skul long 2005 yet.

Namba wan Intanesenel pilai bilong em i kamap long 2009 we em i pilai bilong Australia agensim Inglen (England) long Yurop we Australia i win 18-9.

Genia i bin winim "Man-of-the-Match" awod long dispela gem bihainim gutpela pilai bilong em.

Long 2010, Genia i kamap kepten

bilong Supa 14 klap bilong em, Queensland Reds bihain long James Horwill husat i bin kepten, i kisim bagarap long pilai.

Gutpela pilai na tingting bilong em long "mekim samting tasol" i mekim Genia i winim planti sapot bilong ol sapota.

Em i winim tu "Pileki" awod we ol wanpilai bilong em i makim em long kisim na tu "People's Choice" awod long 2010.

Dispela ol samting i strongim Will long kamapim na strongim gem bilong em moa yet.

Tasol Will i no lustingting long asples bilong em long PNG na i save go i kam long lukim ples na sekim ol arapela femili husat i stap long hap.

Dispela gutpela luksave na tu tingting bilong em long go i kam long PNG i winim sapot bilong em long wanpela sponsa bilong PNG.

Ela Motors i luksave long Genia na i kamapim wanpela wokbung we bai lukim Genia i kamap olsem pesman bilong ol.

Aninit long dispela sponsasip, Genia bai makim Ela Motors long ol wok promosen na maket bilong ol.

"Will i save go i kam long Australia na ples olsem na long dispela ol raun bilong em bai mipela i bung wantaim em long mekim ol wok bilong mipela," Maketing menesa bilong Ela Motors, Paul Abbot i tok long wanpela stetmen pepa.

"Will i save pilai namel long sampela ol nambawan pilaia insait long wol na planti ol yangpela PNG manmeri ken lukluk long em olsem gutpela piksa long bihainim," em i tok.

Abbot i tok ragbi wol kap i kam klostu na planti bai gat laik long lukluk long dispela gem na Genia em i wanpela pilai we planti bai lukluk long em.

Lembo laik win gen

Andrew Molen i raitim

BIPO long em i kam long Mosbi long 2007, David Lembo i nogat wanpela save long kikkboxing o masol ats.

Em i harim save long dispela spots na i laikim olsem na em i bihainim ol arapela i go long trening wanpela taim long 2008.

Laik bilong Lembo long kikkboxing i go bikpela na nau em i laik pait moa yet bihain long em i winim gol medol long 2010 nesanel sempionsip long Mendi long Disemba 21.

"Mi gat bikpela amamas tru long dispela win bilong mi na mi laik go insait long ring gen," em i tok.

Lembo i tok em i redi long 2011 nesanel sempionsip we bai kamap long Madang.

"Mi redi tasol long go na winim narapela gol medol gen," em i tok.



HANGRE: Lembo i laik winim moa medol long kikkboxing. POTO: Andrew Molen.

Lembo, 20 krismas, bilong Kopia-ago long Sauten Hailens provins i bin go insait long ring olsem wan-

pela paitman namba wan taim tru long 2009 PNG Gems long Mosbi we em i makim NCD.

Em i bin lus long dispela pait tasol i no givap na i go bek na trening hat moa long redi long dispela tonamen.

Ol sinia kikkboxsa husat i lukim Lembo i pilai, i amamas long pait bilong em.

Lembo i stap namel long 13 kikkboxsa husat i go makim NCD long dispela tonamen.

Olgeta i lus long fainol long kisim silva na Lembo tasol i stap namel long narapela tripela husat i winim gol bilong provins bilong ol.

"Mi bai tren hat moa yet nau na mi laik kamap wanpela biknem kikkboxsa na i go pait long ol intanesenel tonamen long PNG na ovasis tu," em i tok.



SPOTS



Isu 1898

Wan wik: Fonde, Janueri 6 - 12, 2011.

EHP sapotim Lahanis

Provinsol Gavman luksave long spots developmen

James Kila i raitim

ISTEN Hailens Provinsal Gavman (EHPG) i givim bikpela luksave long Bintangor Goroka Lahanis na i putim K150, 000 long 2011 baset bilong en long sapotim sempion ragbi lig tim bilong 'Apo Kantri'. Gavana Malcolm Kela Smith, i tokaut long dispela taim ol memba bilong provinsal gavman i sindaun na pasim 2011 provinsal baset las mun (Disemba). Kela Smith, i tok olsem Lahanis i sempion tim bilong las yia na i mekim provins i amamas tru na i kisim trofi ol i winim i go long Goroka olsem na gavman bilong em i amamas long sapotim ol in-

sait long 2011 resis. Gavana i tok olsem dispela helpim provinsal gavman i givim em i stap insait long sapot ol i givim long komyuniti sevis na spots, em wanpela eria ol i laik sapotim. Lahanis i bin winim Mendi Muruks long gren fainol long Lae. Long fainol i lukim planti sapota na ol manmeri bilong Isten Hailans stat long Daulo Pas i go long Kassam Pas, i pulim lain i go long Lae long lukim na sapotim tim bilong ol. Kela Smith, husat tu i siaman bilong Fainens insait long EHPG, i tokaut tu olsem provinsal gavman i putim narapela K150,000 i go long sapotim Tim Isten Hailans long go pilai long PNG Gems we bai kamap long Kokopo long dispela yia. EHPG i laik strongim junia devel-

opmen na i putim K30, 000 insait long 2011 baset bilong en long sapotim junior skul boi ragbi lig developmen insait long provins. Em i tokaut tu olsem EHPG i putim K100,000 i go long EH Provinsal Gems Komiti long putim kamap ol Distrik na provinsal gem long makim ol tim long go pilai long namba 5 PNG Gems long Kokopo. Dispela tingting bilong PNG Gems i bin kamap long Goroka na Tim Isten Hailans i save givim gutpela salens tru insait long ol kompetisen long gems. Sampela ol biknem etlit o spotsman husat nau i makim kantri kisim luksave long PNG Gems long Goroka. Ol dispela lain em strongpela meri bilong ron, Toea Wisil, Salome Dell na tu man bilong ron longpela rot, Sapolai Yao.

LUKSAVE: Ol lahanis i kisim helpim long baset bilong Provinsol Gavman dispela yia.

24 Sempion laik helpim ol PNG paitman

25 Greg Inglis bai stap wantaim Souths

26 Samoa bai bungim Australia pas.

Johnston's Pharmacies

For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.

All Sport and First Aid requirements.

P.O.Box 1066 Boroko.
Phone 325 3185. Fax 325 0190.
Email sales@johnstons.com.pg."